





THE LIBRARY
OF
THE UNIVERSITY
OF CALIFORNIA



5563.9
7045





蘇東坡詩序

嗚呼蘇東坡先生乃在於是斯傳其寂寥也殆似金瓶之十刺者以是丁
其人耶抑其遺者乎嗚呼蘇東坡先生詩翰書字駿入其氏綾被篋族世
居朝右有聲諸公於門者書而守其先業保其里閭鄉邦之與移
家誠亦不求人知余嘗一再讀而傾倒則有之誠然則君子人也
頃年甲戌聖其回甲而余往賀之航海交錯風流飄然曾未幾何倏
將游岱已矣乎何處得而茲愛山河之遙然瞻瞻自少為詩甚富覽
而亦多散佚然則氣運移不迫而淡與雅得乎性情之正而無求於
巧妙之佳則後之津於詩者自當識之風子乙會思將設梓以行
而心湖李令以事契之重陳校編定為一卷又梓狀稿諸文以附之
且微序於余願惟茲著其何以發揮然既重心湖之勝又嘉余
副能調揚其先德繼述是圖亦不忍辭因為之題其首

丁丑二月初吉紫泉七十七叟壽昌徐相春序

Fannington (Oxon)



錦史詩鈔序

嗚呼錦史詩稿乃止於斯何其寂寥也殆似全鳳之一羽將以是了其人耶抑將遺棄其咳唾歟錦史諱翰書字駿八具氏綾城望族世居湖右有隱德常杜門看書而守其先業保其里閭鄉邦稱之晚移京城亦不求人知余嘗一再接面傾倒則有之誠煦煦然君子人也頃年甲戌即其回甲而余往賀之觥籌交錯風流藹然曾未幾何倏焉游岱已矣乎何處得來益覺山河之邈然噫君自少爲詩甚富麗而亦多散佚然詞氣雍容不迫冲淡典雅得乎性情之正而無末路巧妙之態則後之深於詩道者自當識之胤子乙會君將鋟梓以行而心湖李令以事契之重讎校刪定爲一卷又稗狀碣諸文以附之且徵序於余顧惟衰髦蒼然其何以發揮然既重心湖之請又嘉令嗣能闡揚其先懿繼述是圖亦不忍辭因爲之題其首

丁丑二月初吉紫泉七十七叟壽昌徐相春序

錦史詩鈔序

錦史具公生於甲戌歿於甲戌四十年所作詩不爲不多而殆散佚不過若干篇投之篋中近公之子將付手民請余一言弁卷噫公少余六年公宜序余詩乃反之耶況余有南豐不能之恨何敢言公作然其音藹然有感發之性鏗然有鼓舞之象蓋出孝友文學中來奚但可與言詩乎哉然詩如人人如其詩讀其詩不知其人可乎公多好友心湖李令其最常爲余娓娓道公公不可復見矣風窓雨燈椎筆數行文弁卷嘻余何可序又何可不序

弗湏七十翁波澄尹甯求書于農圃草堂時丁丑上元翌日

錦史詩鈔序

朱文公曰天降生民則既莫不與之以仁義禮智之性矣然不能皆有而知其性之所有而全之也聖遠言湮道與世降俗儒記誦詞章之習其才非不美矣其文非不宏且多也其天性之能存而全之不爲外誘所移者鮮矣惟錦史生稟純粹重厚之姿兼之以至孝篤友之行仁厚敦睦之誼忠恕謙讓之德蘊諸中而藹然現於言辭之外追先裕後靡不殫誠處世接人坦夷直行居於宗族而宗族和悅處於鄉黨而鄉黨模楷分土捐金爲公及私可謂惠且施博矣至於詩文之作於公爲餘事不足以議公之萬一也人或言以公之德之行不見需用展布於世爲惜是豈知言自古賢人君子不以窮達而有輕重其不得黼黻王庭致吾君澤於民乃氣數所關世道之不幸於公何有其胤乙會甫哀輯遺詩將付鉅梓以圖不朽俾余讎校又爲序以相茲役自顧無狀實不敢當且戚在中表居同一閭見聞既熟粗知顛末亦難終辭遂叙梗槩以俟後之君子竊念湖隱公以清德

錦史詩鈔

詩

附錄

壽筵賀章

輓詞

家狀

墓碣銘

序

跋

錢史詩錢

Blank manuscript page with horizontal ruling lines.

錦史詩鈔目錄

七月既望會獵魚

與諸益偶會

江堂山莊雅集

餞春後日

有感吟

賀人壽筵

爲客吟

久留申庵

過東林留宿

元堂瀑布雅會

菊秋逢友

有客

秋興

入山

移寓院坪後作

與李愚齋台夏同吟

戚從兄李學圃學冕來訪

送春

秋夜

其二

雅會

清興

過開心寺

訪友

清秋雅會

送友有懷

迎友

饒春

與諸益共賦

學圃與李石潭敏甲來訪

客自香泉寺來訪

送友

訪隣友

院坪會步前韻

獵魚

旅館獨坐

故人來訪

正初會三友

多感懷友

即事

有友每逢

與金進士艮山寄瑤共賦

與金忍齋泰愚共賦

鳳林雅會

野村即景

與二客共吟

愚汕惺菴默軒來會

學圃與李桂山敏泰來訪

正初偶會

又逢學圃桂山

其二

情話

夜景

爲客滯雨

江堂寺

其二

其三

有感

閒中即事

盤石會賦

雨中作

與李鳳岩共吟

立春後日與隣友共賦

與學圃共賦

訪潭雲

雙龍瀑會

院坪夜作

贈李東蓮

愚齋學圃桂山來訪

滯雨留客

漫興

與學圃愚齋共賦

訪栗里

次金氏貞烈韻

遇申平谷

秦璉

與洪開峰

性德共吟

即事

漫興

學圃又訪

盤溪即事

贈金靜窩

彭洙

訪金峙石潭

過茂長墓下

申菴留宿

其二

訪塾師

華城途中

賀族叔淨沙丈壽筵

陶靖節

輓塾師

次族叔然興氏壽韻

敬山壽韻

學圃壽韻

次密陽萬雲齋韻

其二

禮山郡邑內八景韻

八首



錦史詩鈔

綾城具翰書駿八 著

七月既望會獵魚

碧樹蟬聲糝。極秋蒸雲餘熱未全收。聊知淡泊騷人趣。不讓繁華俗子遊。舊路西南多得友。長堤上下恨無樓。短筇斜日歸休促。爲獵銀鱗更少留。

與諸益偶會

溪山到處故人多。詩酒百年興若何。喚友間關黃鳥語。過雲清絕少年歌。孤村水近樓先月。疎雨風多麥自波。此日佳緣龍澤在。問君高致幾回過。

江堂山莊雅集

一年春色代天功。遊子尋芳到此中。垂柳樓臺烟似霧。落花時節雨兼風。携魚載酒臨溪碧。迎夏逢春秉燭紅。白笑清狂多漫興。江堂今日訪仙翁。

餞春後日

歲歲常難送是春詩情到此復如新三朝爲樂忘歸客十里相居惜
別人黃鳥喚朋同出谷杜鵑懷國化前身晚年多有清狂趣白髮山
翁懶不巾

有感吟

病於世俗未聞安況復其間有四端趨利人皆爭富貴好賢誰獨樂
貧寒雖云日月明如許其奈山河路亦難欲解萬殊思不得敬亭山
色捲簾看

賀人壽筵

吉星南極降真人六十一年賀慶辰瑤瑟荆闈家室樂青雲洛樹弟
兄新衣冠齒德尊鄉黨宗族兒孫感孝仁好是錦還兼壽酒問君此
席幾明春

爲客吟

一笑出門萬念灰聞君山水訪君來花樹同隣分宅里雲林佳境起

樓臺客久他鄉多熟面酒香近社送情盃行且遲遲歸且晚三旬旅館我心催

久留申菴

芳年飲水洗塵心學得仙琴訪解音白酒兼旬遊海客黃花九月入山林一鴈盤湖紅葉下孤城申寺白雲深人恠我留相笑問旅闌何事費光陰

過東林留宿

天藏別界人功加棲谷依雲三兩家芋栗收園多趣味稻粱滿野足生涯早菊含芳將進酒晚楓如畫勝看花盡日逍遙因獨宿無人旅榻共喧譁

元堂瀑布雅會

大麥南風梅雨新元堂觀瀑布值佳辰噴翻飛雪常飄面淘洗氛塵可潔身今日盃盤猶不儉此鄉魚鳥舊相親真源欲溯龍峰下眼豁然時志亦伸

菊秋逢友

名園風物眼森羅
白首相逢醉放歌
驛路送人趁曉發
霜天關鴈拖秋過
晴光入戶峰如畫
冷氣噓溪瀑自波
無酒有賓清興少
黃花含笑最情多

有客

瀑龍昨雨忽今晴
老少衣冠坐水聲
四圍碁出峯陰翠
一面砥平石氣明
風物遇人供興足
溪山得主倍輝生
多情谷鳥來相語
應識年年此樂情

秋興

行行山路後前呼
賞菊觀楓其樂乎
田畝秋登黃滿野
澗溪水活碧成湖
幸同諸友清談席
洞飲今宵濁酒壺
休道詩人心計拙
七言城作可防胡

入山

遊興悠悠待曉晴
濃陰喜聽好鳥聲
踏迴仙境烟霞濕
別有人間日

月明崔嵬岳勢撐天立
浙瀝湍流觸石生水複山重如許壯文章幾歲寫真情

移寓院坪後作

身如投鳥擇新棲三載不飛又不啼
欲隱青山松暗暗更耕白水草萋萋
書無周讀才兼魯俗同楚咻意未齊
滔滔濁世難行路一曲浩歌放杖藜

與李愚齋台夏共吟

黃梅時節又逢君相對論文多見聞
隔澗松聲恆送雨依山屋角半棲雲
峰何落鴈書常阻地是鳴牛路不分
吾家宿釀藏之久龍瀑更看魚鳥羣

戚從兄李學圃學冕來訪

萬樹方濃勝槩多浮生此世不遊何
山高可寫詩中景店近頻聞酒後歌
谷口草長難覓路渡頭風靜不揚波
龍瀑一區稱別界文章從古幾吟過

送春

君去年年我鬢絲我今來又送君時解惜幽禽歌歷歷顛狂老蝶夢
遲遲盡日迷離芳草岸番風招悵落花枝煮鵲臨瀑雙龍動酒國長
春是好期

秋夜

滿酌黃花上面紅詩懷未盡一宵中巷柳任疎秋雨急隣籬見破曉
燈通隔浦寒聲羣去鴈入床感意亂鳴虫讀書方夜多幽興猶有山
家歐老風

其二

重陽風雨過城邊霜意催寒峽裏天留客題詩楓葉屋送兒貫酒柳
橋川黃花晚節懷元亮明月清宵見仲連隔嶺源源如有約故人相
對意欣然

雅會

處處名區勝會多問諸遊伴興如何逢迎盡是漢唐士慷慨誰非燕

趙歌雨脚如絲難破塊溪流激石自生波詩家有酒十千斗韻展臨門直不過

清興

禪心俗態便相同岩上松間一路通地擅文章遊去後秋回壯士老懷中天北朝烟微送雨巷西斜日晚生風離亭更問歸家路君自江南我自東

過開心寺

釋門遊客百懷寬有酒相逢盡意歡書劔未成空費日醉醒無願莫彈冠石榻雲來禪偈靜海天霜降鴈聲寒晚菊秋光非俗景年年此地與君看

訪友

軟陰佳節始逢君君有高名已熟聞天心若阻雙龍路雨意恆多鎖日雲大地看來波一色青山欲描畫三分寄語流鶯啼盡意詩人去後亦離羣

清秋雅會

栗林臨水稻花秋舉網溪村雨適收七月恰如壬戌望一川忽似赤
江流鱸魚飲墨聽詩句沙鳥提壺過酒樓寄語諸公須夜醉古今不
改月明遊

送友有懷

題詩紅葉似綾羅醒則論文醉則歌蘭社舊緣今復續菊辰清景豈
虛過難得人間停歲月休言海外有風波驛樹亭亭君且去蒹葭古
渡我懷多

迎友

山朋追逐隔溪招來自遠方其樂乎到處偏多閒日月斯樓特立好
江湖學兼新舊題詩輒業勵士農饒酒壺近日衣冠多變幻孰爲中
夏孰爲胡

餞春

今朝白髮昨青絲天道人情皆莫知柳絮漸飛山寂寂麥颺初至日

遲遲昨夜已過芳華雨暮春猶存落花枝停盃我欲問啼鳥送又明年自在期

與諸益共賦

詩人到處事還多暫苦休吟寂寞何鸞尾低青風剪草鶯兒偷綠柳爲歌空山不老禽相語古渡吞聲水自波衰去心情隨日感繁華時節夢中過

學圃與李石潭敬中來訪

楓菊滿山黃又紅遊人應詠樂新中丘水爲家心正潔以文交友誼相通江天疎雨來來鴈書壁寒燈唧唧虫如今佳節憂供趣惟願留君樽不空

客自香泉寺來訪

如非有約每難逢君忽見尋起我慵飛瀑前春同洗足光風此地又開胸散合無期萍泛海醉醒隨量酒盈鍾文章來自香泉寺百戰餘生尙舊容

送友

林下讀書見士多住朋一會果如何十里看山山似畫百平有酒酒
爲歌松榻雲來遙自岫瓦簷雨急亂生波妮妮情談猶未了別離無
奈虎溪過

訪隣友

仁里芳隣我得先山如太古日即年風花處處紅塗地麥雨家家綠
漲田畝靜曾尋野說扶衰不倦到樽庭夜來雲散多明月詩句清
新欲寫天

院坪會步前韻

詩因酒力上樓先咸集今筵少長年蜂鬚日暖紛花塢鷺尾風輕繞
麥田逢迎泉石佳麗地談笑盃盤狼藉筵送別凌忿留後約良辰四
月綠陰天

獵魚

漁歌一曲起諸公槐柳前川是會同谷鳥多情啼上下水村無事住

西東夕陽遠漏峯頭樹秋氣初生水面風煮酒烹鮮滋味厚陶然此
集何時終

旅館獨坐

旅館寥寥晝掩門伽椰山色雨昏昏石澗長瀑銀河瀉嶺外歸雲鐵
騎奔往跡莫追徒振觸主人相對更溫存離亭贈以招提約幾日思
君枉斷魂

正月初會三友

正元天氣喜新晴故友相逢建酒旌周度時鍾常北轉滿簾初月忽
西傾稍欣三老青燈坐虛送五旬白髮生寒風終夜響窓隙助此幽
人鳴不平

多感懷友

處安事事戒思危萬物消長各有時滄桑世界伊誰過海粟人身自
古悲白髮雖多詩不老黃花欲發酒先知一別居然經一歲浮生散
合亦難期

即事

數家住白雲間樓外重重雲外山別如電迅同分手逢亦萍浮更
對顏草笛兒乘黃憤去釣磯人與白鷗閒詩樽復續遊緣好未盡論
心故不還

有友每逢

麥南山亭客枕寒君頻攪我夢何安勞勞心事求齊瑟草草行裝適
越冠心丹許交金可斷眼青相對酒能寬招招隣社風烟外詞友當
前敵最難

與金進士艮山寄贈共賦

雨細烟青客到時途兒酤酒又題詩石澗纔通魚泳穴嶺松特秀鶴
巢枝藥逕採歌雲漠漠草堂睡味日遲遲先生觀海難爲水韻意如
流不可知

與金忍齋泰愚共賦

野來筇屐入山扉盡日高吟對翠微江天踈雨人投釣野渡垂楊客

攝衣文成機杼功難得琴奏峨洋識者稀
沔北舊知如問我松風蘿月世情違

鳳林雅會

武夷曲曲紫霞晴塵世功名一羽輕
陶金石井穿雲汲種玉山田帶雨耕
鳳去千年君子隱鶯啼五月故人情
何許先生歸栗里黃花佳節訪淵明

野村即景

雨霽春城物色加一邊桑土一邊麻
溪邊細細絲長柳庭畔垂垂葉大芭
交契如期東海月卜居無妨碧山家
江天來鴈緣何事兩岸瀟湘水碧沙

與二客共吟

三日一樓二客同方塘半畝照心通
琴韻人來流水上仙緣鶴睡白雲中
斂葉暮烟情有別稻花霖雨歲成功
更問明朝分手約海南孤棹海之東

愚汕惺菴默軒來會

萬里江天一雨遲
蟬聲七月夕陽時
橋斷野無人送酒
山深樓有客題詩
二水中分鷗浴渚
孤松特秀鶴巢枝
古宅申菴花樹里
久留不妨更何之

學圃與李桂山敏泰來訪

十里穗城一路長
好顏相對座生香
有酒百年來阮籍
讀書方夜見歐陽
洛城樓閣誰爲主
盤土林泉自在鄉
三秋已久來何晚
風月斯筵復有光

正初偶會

白頭三老對青燈
風味清涼夜更澄
讀書林下多看士
有酒家中好得朋
松因鶴立高千尺
梅與樓齊秀一層
歸時莫作盤溪路
或恐橋頭履薄冰

又逢學圃桂山

天氣淨清高閣寒
蒼顏白髮好相看
高士來時詩社結
新年到處酒

孟寬築室愛吟閒日月還山更對舊衣冠
臨別歸程留後約他宵相憶每依欄

其二

主人臺上客看書塵累無關靜裏居
西湖歲月眞留樂南國風流興有餘
近野樹深投宿鳥滿塘水積養苗魚
來何晚也歸何速舊日多情更若踈

情話

山下一樓月正明頽然獨坐對書生
樂在盤溪因築室意遙塵世防如城
露濕殘花還有色雨過疎菜潤無聲
別後苦思來日約江村垂柳遠含情

夜景

抵暮客來問主人喜聞情話感賢仁
隨時可愛成詩社隔夜還嫌遠酒隣
瓦簷急雨聲如瀑石砌殘花色猜春
懶起開門樓上坐稻花滿地野容新

爲客滯雨

春水方生綠漲橋陽關柳色雨今朝情懷道路分花樹問答鄉隣關
汲樵鳥棧三千知險阻鵬程九萬搏扶搖主人田宅爲窮僻勤儉何
如古相蕭

江堂寺

除却秋懷強自寬叅同僧俗好相歡紅葉題詩唐筆法黃花酌酒晉
衣冠中通石壁泉聲細上踈瓦簷松影寒欲分未別慙慙立老釋無
言脉脉看

其二

觀世南無一曲歌山光曇影共嵯峨項珠百八垂垂在別界三千得
得多客子炊茶臨石竇僧難洗鉢俯泉波開心即向如來坐靜寂於
今問若何

其三

此日此筵有此風聯襟談笑與君同村僻客疑遊物外樓高人語出

雲中琴心臨水衣全白詩思看花眼亦紅久藏宿釀留來約寶德山
光入望通

有感

老去偏憎歲月流雪霜容易滿人頭倏忽天時磨蟻去須臾塵事幻
蜃樓物色新春非舊日蕭條寒士獨深秋餘生詩酒從吾好可使奚
囊汗漫收

閒中即事

松下白雲晝掩門終朝至夕坐昏昏歸霧隨風山氣淑小溪得雨水
聲奔盡日看書人不厭兩宵聯枕夢常存做工未熟才兼魯半百光
陰浪費魂

盤石會賦

松陰如海麥天晴行盡溪山步履輕樵笛兒乘黃犢去沙洲人與白
鷗耕浮世顛狂多酒力名區行樂揔詩情瀑布聲中盤石上吟哦未
了夕陽明

雨中作

西風吹雨入山扉
盡日清談對翠微
聽水方知溪近戶
看書不覺汗沾衣
厨供未給薪兼濕
隣屐難通客亦稀
四韻未成詩令急
先忘後失每相違

與李鳳岩共吟

事事難成日月忙
當今焉用讀書堂
涓市歸來餘馬骨
蜀山踏盡半羊腸
風前鷺似情人待
雨後花如老妓粧
逢場吟詠知何事
默坐心中有佛王

立春後日與隣友共賦

經歲出門卜日清
北風吹送我行旌
祝辭處處桃符換
醉面人人栢酒傾
白髮相看憐意重
舊基回顧感懷生
少多情話青燈遠
雪色晨光一望平

與學圃共賦

重訪君家龍瀑西
麥秋餘氣尙淒淒
地勢深藏李盤谷
水聲不讓柳

愚溪烟歇池邊秧馬出月明山上鼎禽啼車笠舊盟今若許徜徉從
子手同携

訪潭雲

登登鳥道十分危望裏風光歲暮時紅染長林秋色晚冷侵遠塞鴈
聲悲白髮是公難可免良辰不飲更何爲遊筇伴到溪邊屋滿座文
章摠舊知

雙龍瀑會

仙界淨無一點塵桃花已盡武陵春桂坊舊士光生座蘭契新情德
有隣樓臺自古無常主泉石於今獨有人莫言不進牛山會一飽何
曾羨八珍

院坪夜作

士林村上柳林成濁世飄然子獨清看君才冲三年鳥求友情多四
月鶯樹陰釀雨千山暗麥氣凝雲一野平倘聞此地名區否龍瀑飛
流石自橫

贈李東蓮

有時好友遠方來
況復衡門花正開
近市疎烟人送酒
小橋明月客登臺
山起鳳林天際立
溪隨龍瀑石間回
歸程不負遊春約
四月綠陰復有盃

愚齋學圃桂山來訪

於土於農一不治
返羞六十竟無爲
平沙流水鷗夢潔
古木殘花蝶舞痴
松嶺近天雲漠漠
草堂足睡日遲遲
風月今宵君若去
仙菴勝景有誰知

滯雨留客

連日未歸祈雨晴
知亭漠漠沔陽城
客何憔悴詩爲癖
人自送來酒有情
始見黃牟知夏至
如催白髮是鍾鳴
睡起坐聽風便水
急湍驅出萬千兵

漫興

前來相應後來呼
乘夜斯行君與吾
舊遊夢阻青雲洛
清趣樓高素

月湖初過溪路隨花柳近入山門散竹梧何愁海外紛紛事詩意如城可防胡

與學圃愚齋共賦

客到初筵情不輕詩能招酒酒筵成二水合流遙達海四山羅立繞如城清綠澗畔松風細豐像田間麥雨晴沔陽一路相非遠不妨他時伴此行

訪栗里

相尋隱者過村東把臂清談一夜同取醉渾忘今世事贈詩爭效古人風山經雨洗仍添碧花被春寒未綻紅別時苦憶逢難別其奈靈犀一點通

次金氏貞烈韻

視死如歸少不愁從夫以外更何求追隨地下中心願生在人間一日羞妻砧夜雨腸空斷湘瑟秋風淚自流貞烈芳魂同窆穴此真君子好相迷

遇申平谷 泰璉

主人臺上故人迎，永夜清談相不輕。
雨過洞樹雲歸宿，春到山庭草始生。
斯樓舊景元無價，高士新詩復有名。
臨歧休唱陽關曲，萬事悠悠一曲成。

與洪開峰 性德共吟

梧桐一葉報新秋，大扇搖來共上樓。
近水孤村山月在，連天平野火星流。
琴客來時如有韻，詩人到處自成愁。
花樹西隣聊共樂，斯筵長得卜清遊。

即事

偷得吾生此日閒，世情迢遞百年間。
留緣今夜多明月，相憶他時對碧山。
杏花逢店人沽酒，楊柳微風客渡灣。
麥氣新晴寒食雨，田家稼穡最爲艱。

漫興

十載琴書樂吾身，烏帽青衫又布巾。
歲月蹉跎流綠水，文章蹭蹬過

春雨霽古梁魚浪細烟深遠樹雀巢新洛社舊朋如問我東風花
柳未歸人

學圃又訪

一舍溪山一路長順成纔度即書堂昨夜思君明月榻此時訪我綠
陰鄉梅花古屋成佳會蓬華寒門自有光人情喜得年豐樂大麥家
家占少康

盤溪即事

溪南物色雨中新佳氣菰惹遠俗塵水竹孤村開別界琴書十載可
安身烟收一區芳草路風微三月杏花春漁歌數曲依如夢故入桃
源問主人

贈金靜窩

彭洙

聯筇無日不看花水郭山村道路斜勝地春多携酒客古風人有讀
書家孤松秀嶺生琴韻飛瀑衝岩噴雪華下界烟霞仙庶遇登登絕
頂不嫌賒

訪金峙石潭

多日經營今始來主人歎曲好顏開怡雲留宿依山屋玩月登臨近
水臺滿地烟霞峰簇簇連墻村落路回回隣朋嘲我春遊慣詩一吟
時酒一盃

過茂長墓下

風雨霏微惱客情此身篷泊度江城宋人章甫元無用楚澤離騷自
不平粒粟苞黃催歲熟葉萑碎碧轉秋聲故山松栢今將老百里湖
南一杖輕

申菴留宿

申菴山下我行遲一雨支離適此時橋樑不通難送酒芭萑雖老可
題詩十里江聲來遠枕三分秋意在高枝洪北沔南名勝地捨茲花
樹更何之

其二

紅蓮花發碧萑長吟罷新詩牙頰香月影滿樽逢李白秋聲在樹臥

歐陽居然相別今三朔恨不同留此一鄉有客西床新契厚精金煉
采玉磨光

訪塾師

初尋松下白雲門知是吾師杖屨村
早世地靈多福履晚年肥遯且
溫存翰墨餘痕立家範詠觴高趣厭塵喧
蕭蕭布褐來叅謁更被提
携漫費魂

華城途中

行尋東郭典衣裳春酒盈盈春日長
忍別今朝樓寂寂相思他夜路
茫茫洞歸雲影山猶碧澗泛桃花水
自香上下柳川繁盛地短鞭高
馬誰家郎

賀族叔淨沙丈壽筵

仁人壽福降由天無事康寧六十年
宜兄宜弟文章並多子多孫孝
友傳樂從琴瑟今偕老志在山林不遠仙
滿引瑤桃花下酒登筵頌
祝共歡然

陶靖節

靖節天君直又廉北窓閒月捲風簾彭衙畢竟籠鵬放晉史分明菊
露沾蕪矣旧園春有事悅於親戚話多謙五柳東風因拾絮先生憂
國所何嫌

輓塾師

強輓靈輻泉下行寢門匍匐哭先生典型未見疑顏色教誨如聞在
耳聲鬼亦愛詩迎地府天應感孝命閭旌子孫弟姪雖哀悵不及此
時師母情

次族叔然與氏壽韻

壽域春風酒氣清桃紅柳綠雨初晴有子最歡今日舞宜家同樂百
年情隱居不欲青雲去公道無嫌白髮成如今更祝無彊福富且康
寧享太平

敬山壽韻

仁亦其天壽亦天宜乎百歲又千年安閒不與三公換孝儉惟令四

子傳從今奚獨祈黃耆自後非難作老仙醉來欣看兒孫舞琴瑟華堂坐泰然

學圃壽韻

壽必爲仁然後期況乎五福又兼之東國文章初度歲帝堯日月復明時愛看舞衣榮繞膝歌奏朝雲喜生眉從此風流仙不遠遨遊一枕夢龜茲

次密陽萬雲齋韻

地靈鍾出海之東朴氏諸宗務大同追遠不忘先祖德從今復動後孫風世外文明廊月白壇前儀物簡門紅一鄉多士流光寶大廈千年大化通

其二

巨姓密城東祭壇三位同己陳先世德不墜古家風百代雲齋潔長春花樹紅如天元氣大日月照相通

禮山郡邑內八景韻

烏山朝旭

半天高出一烏山太古秀容鬱此間願將此岵朝朝旭換作春光到

玉關

香泉古寺

香泉之水水之陽古寺淨清佛一堂昏衢世界鍾聲落萬戶自生一

夜光

蕭山盤石

蕭堂山下水流寒盤石庚庚自涌灘更使遊人多會此或吟或醉世

情安

層岩孤松

岩松落落老如龍特秀寒天侮大冬晚翠不移千古節時時愛惜孰

如儂

禮城古塔

海隅禮城一片孤層層高塔不依扶圓似像天方像地形容磅礴自

城圖

五里細柳

五里亭前百姓家垂垂細柳日中遮三月東風嫩綠色枝枝葉葉鎖烟霞

島中秋月

島中秋月明如流夜夜先登近水樓慙慙每到天心處滌盡胸中萬古愁

城市青烟

四環山下一溪前城市大開別有天萬戶青烟都會地爲看光景起朝眠



錦史詩鈔附錄

序

日學圃李丈訪余斗山精舍袖示一冊子曰此故錦史具公之壽詩
壽文其胤乙會甫將欲鈔梓而抄本叢雜託余正抄者也余則神毫
不能請君精寫正抄焉余雖拙筆不啻李丈之囑揆以具公喬梓之
情誼辭不獲已乃盥手抄訖擎讀再三而作曰古有嘏辭今有壽詩
壽詩蓋祝其人無量遐籌且述其人平生攸爲者也公之壽詩與文
篇至三百皆金石佳句長杠大文著述公之文章德行事業一開此
卷則瞭然知其平生所爲也嗚呼公今雖沒令名不沒若使千百歲
後人觀此卷則知千百歲前公之令名矣與世人呼庚呼癸之壽果
何如哉譬若天壤之懸矣乙會甫雅士也登之剞劂傳之于世以壽
其先大人之三不沒蓋顯揚之一端繼述之一事以是相傳于子子
孫孫繼繼承承永世勿替成躋仁壽之域則公之名聲不墜豈止千
百歲也哉公之平生事此卷中諸君子已言之不必更贅也云

壽筵賀章

晤朝自述 甲戌二月二日

鑑史

歲回重甲月重新階上丹竇二葉春先蔭蒙遺勤儉業後昆猷做太
平辰初載蟄鄉從某水晚年遊洛逐時人弟兄無故兼偕老稱介云
爲飾慶辰

舍弟翊書

丹竇二葉抽春階是日弧筵亦復佳平居愧乏如嬰保老去尤多每
孔懷冲年某水同鄉第晚代清風灑洛涯追先裕後皆從理萬事宜
家一不差

韶顏白髮鏡中明偕老瑟歌和且平生我劬勞同有感持身謙讓自
無名壽觥洛社春暉永鄉夢湖樓夜月清無量遐壽添海屋聊將筦
樂奏歡情

男乙會

椿堂重甲弧筵成飾慶吾門和氣盈養志多違怡顏色趁庭未奉教

慈情劬勞感慕惟難慰喜懼誠心倍自生曾費羊裘菜斑舞欲效今朝獻壽觥

移家京洛遠鄉隣積蔭由來福祿新人間享得東方甲天上照回南極辰小心常恐忝良訓厚德深知稟至仁菲薄稱觴堪飾喜華堂自愧速嘉賓

從子岷會

西入長安同一隣琴床棣座兩情新花松有戒趨羣子龜鶴呈祥迨吉辰舊業青氈多繼述遐齡白髮克溫仁前庭叅舞斑衣列菲酌那堪速衆賓

從子斗會

璇風琅月好爲隣仙降吾門鶴髮新鎮日桑蓬回舊甲弄春梅柳值佳辰庭前有子思承孝洛上爲家擇處仁欲把五湖呈古畫華觥壽域對朋賓

從子拯會

南山青不老東海浩無窮山海萬千壽稱觥樂在中

外甥李 炫

介壽高門二月天極星爛爛照前樽
塢篴吹曲和樂日琴瑟調絃偕
老年彩舞登庭爲子孝紫霞上面即仙緣
愧吾甥館無瓊玖遙祝崗陵頌一篇

從兄鶴書

吾門從列不多人復見星星白髮身後我七年
今甲戌問君幾日守庚申
蓼莪篇上劬勞感琴瑟聲中晏樂新
但願東風花樹下好將樽酒悅相親

從弟賢書

今夫歐亞之人邂逅於逆旅一宿而分可謂踈矣
然他日相遇於中州未嘗不握手歡迎道之以逆旅之舊交
若平生者况一門之內至親者乎
余與從氏錦史先生非但從行生同一歲自七歲以來入學於叔父之門晝則連檠夜則同被一塊焦飯一顆榛栗分以飼我如

是同業十有一年逮在甲午家運不幸先妣見背故未得同塾因以遊散不能效愛我訓我之萬一而遂至於樵牧之流至於老大回思曾昔每夜無眠從氏仁愛之德尤不覺悚感矣噫以疎遠之人一旅之舊猶有握手之歡所以自愧者反不如歐亞之逆旅今當覽揆祝岡之辰遠近僚友賀章千百而不可無一言余以不文胡能效嘖哉然聊表微忱敢搆一詞而獻祝曰

料將瓊液祝遐年壽以增之富以傳毓氣迥浮花樹外情根深托海棠前一鄉淑德稱陳湜羣季諸從有惠連第待簪仙生子日霞樽更速四方賢

從弟樂書

拜獻霞觴祝甲年更期壽福無彊傳羣飛鴈陣吾從末斑舞花筵子趨前瑞日漢江春水足和風嘉谷彩雲連老年嫌寂鄉山屋市隱長安做逸賢

從姪秉會

花樹東風二月春正當飾喜吉良辰兄弟衣冠同守舊兒孫書禮復
生新鄭重高名稱達士燕安清福是仙人遙知六甲非多日但願年
年共此隣

從姪泰會

自天先得壽知是必由仁鄉里稱君子家庭大福人賀聲兼進祝和
氣倍生新花樹多餘樂來來萬歲春

從姪聖會

鍊樹花開六一年吾家此席世相傳蘭竹非徒盈膝卜琴瑟況復和
床前夜晚星光如斗大秋深石廩接天連晚來事業多慈善鄉黨口
碑皆頌賢

從姪哲會

年年祝壽復年年春日麻姑送酒傳火棗水桃樽酒上仁山智水盡
圖前琴瑟清絃情可悅弟兄白首氣同連自古萬乘難力致無私天
必愛其賢

從姪周會

湖雲洛月兩相新
泛泛仙舟滿載春
持心勤儉仁爲壽
處世寬和德潤身
初甲同年偕老室
今朝生色故鄉人
湛樂萼樓斑舞列
六旬一載最良辰

三從弟泰書

廣設瓊筵瑞日新
向陽花樹住長春
乃積千斯尤潤屋
自行三省克修身
如海德門迎賀客
無疆壽域坐仁人
在鄉未赴團圓會
遠望京華頌晬辰

三從弟龍書

凡仁人得壽理之常也
惟我三從氏錦史公稟天之性
出羣之姿孝親養志友睦信義
察時守道躬耕成家鄉黨稱聞焉
甲子之歲遊於門下學而未能乙丑
春胤君乙會之遊洛杖履率行往返
得隨行路之際簡約節儉心有所學
焉自抽橋至元坪諄諄教誨戒之勉之
守分知足節嗜禁欲恆思絲枲之不易
勿逐世潮切勿奢華勤儉慎重

勿墜先業以垂後裕乃是士子之道爲學之門眷眷服膺至今不忘而又知公之六十慕父母之孝御家教人自有法度今日之享福豈非天之所報歟拙辭仰賀先於仁而後於壽詩曰

花樹長春不記年無量遐福世世傳斑舞孝誠趁膝下瑤琴湛樂和床前古規勿墜先人繼餘蔭從知後裔連勤儉成家兼好義口碑鄉黨各稱賢

再從孫滋昇

兩堂華甲同今年二月良辰設此筵到處濟施親戚樂一門次第弟兄賢聽子老居都會地抱孫長醉祝岡天獻觴復問無彊福餘慶斯期世世傳

再從孫滋恆

年雖老矣命維新鋏樹花開萬八春二月韶光和好節六旬享福太平身早歲皆稱湖海士晚來肯作洛橋人滿門親戚歡娛意只願年年樂此辰

三從弟暢書

仁人從古享遐年賀此高門世世傳鵷列叅名浮世夢楸鄉種德半
生前麟孫繞膝含飴戲鯉子趁庭舞袖連大隱晚來塵不染誰知城
市有斯賢

族弟衡書

錦史先生德日新六旬清福自修身承傳詩禮江湖士卜築烟霞洛
社人蓼莪舊感恩親日葵藿向開故國春斯筵未得同稱壽只恨京
鄉不共隣

族姪權會

先天覽揆又今年壽福康寧世世傳時雨棣長雙砌下春風梅發兩
閨前錢仙生子應非遠大邱諸孫必坐連但願一傾東海水丹箋寫
盡滿心賢

族弟祿書

富且康寧六十年穠紛花樹照華筵以孝揚名同舜慕居仁服禮似

顏賢兄弟湛和無故日子孫慶福降先天盡情憑賀岡陵祝從此如公世世傳

族姪正會

身且康寧家正肥人間完福似公稀紹先祖業推誠孝爲後昆謀遠是非洛社烟雲新卜祉鄉園花樹倍生輝樽前俱舉岡陵祝南極星邊映瑞暉

族弟麟書

六旬清福命維新儉約自修德潤身不形喜怒丈夫氣無疾言辭君子人偕老同年今白髮重回餘日復青春親戚歡情非一處先從京國又鄉隣

族弟兢書

花門花甲正花辰嘉會坊中淑氣新家行傳來稱大孝性情元是稟純仁青春事業鄉山夢暮境風流洛水濱猶有清陰窓下竹還山弄月豈非珍

族姪嚴會

高堂慶祝設弧辰好德康寧老大身素封晚境無憂叟斑舞前庭克
孝人極星榮耀重回日棣萼連開六一春皓首同年琴瑟友與公享
福理由仁

族姪斗會

壽域烟霞降自天人間六一設弧筵方圓涉世稱君子積散治家種
福囿南山瑞彩祥雲集漢北春光綠樹連滿醉霞樽無俗事蒼顏白
髮望如仙

族姪正會

北岳山前別有村良辰此會設弧樽一鄉種德難兄弟百世傳家肖
子孫暖風客到三清洞和日春深光化門青雲往跡餘烏帽白首丹
心感國恩

族姪將會

人間五福壽居先況復良辰有此筵黃襪彩衫趨孝子烏紗華髮降

眞仙沔北家聲花樹地漢陽和氣瑞祥天吹簾湛樂床琴又滿醉紫霞賀萬千

族姪明會

壽福康寧地上仙東園桃李設花筵桑弧早射青雲志海屋添籌白髮平九族義庄恩似海三霜血淚孝根天琴瑟塤箴同樂日春風和氣滿樽前

族弟仁書

壽楔者吾儕中生朝日小會名也蓋乘閒叙懷人生之不可無者而如白樂天之香山文彥博之耆英尙矣非後世迂儒之所可及也然隨會叙懷亦不妨於一時勝事也故壽楔之所以設也年齊同志相居不遠者二十二人各持一圓金輪次相會於當人六十一歲生朝之日以爲祝賀之資而兼爲叙暢之計矣今余族兄錦史居士六十一歲生朝在今年仲春之日而錦史移寓於漢北則京鄉落落小會之約地遠難遂不能無悵然之懷矣故錦史還鄉

第擇良日招招會叙余亦忝末謹構拙辭以助其祝賀云爾

結社曾論設此筵來春花甲預爲先六旬一歲前同樂二十二人中
最賢意放江湖真逸士身閒天地即神仙難兄難弟湛和極福祿君
家湊百川

族從然雨

近日南極揚輝意謂壽域之有聞際承春丈晬辰在邇云積德餘
慶理之常也從此期頤之徵將執契以相賀仰想愛日之誠有倍
他時寧不敬叉手也然竊想聞之人子之於親有所謂養志者有
所謂養口體者君子事親不可不兼斯二者而自有大小輕重之
序矣備酒肴舉觴以稱之者壽親之小者也承順親訓善繼喜述
垂之後昆永世無替者壽親之大者也若不然則雖日寅酒張樂
讀保族宜家之祝歌龜蓮鳧藻之章不足以少慰堂上平生之志
也願乙會念之哉事當躬進仰視盛儀兼叙韋家情話而路殊湖
洛竟左其計幸無以踈拙見誚如何一詩聊表賤衷

梅腮柳眼競芳新
舊甲居然六一春
誠孝由天能趾美
名教樂地可安身
紫荊交萼稱知己
寶徽同聲有碩人
鳧藻龜蓮歸善禱
酒闌錦席屬良辰

族姪春會

稀慶高門絳甲新
滿堂和氣住長春
肖子斑衣欣大有
佳賓華祝頌同人
金盈陶屋惟閒宰
恩渥烏紗是貴身
瑤瑟聯床真樂事
南飛鶴曲設弧辰

族從前叅奉碧儂然國

烏紗帽仄綠袍新
鏡樹花開又一春
敦愛吾宗誰有敵
謹修先業更無人
庭抽蘭竹團欒慶
床對琴箴穩藉身
兼得九疇無量福
滿堂賀語樂斯辰

族從貞喜

爲仁必壽自由天
福地迎斯六一年
白髮衣冠非俗士
紅塵樓閣即仙緣
繼先事業令人羨
裕後聲名是子賢
鶴弟龜孫爭獻酒
在傍琴

客醉眉連

族弟洛書

先甲重回後甲年老人星彩繞堂前園棣發華兄弟樂庭蘭秀色子
孫賢繼世簪纓叅陞席養心詩酒載湖船華筵未叙至親悅樹樹嶺
雲遙望天

族從信祖

嘉會洞中景色新再回絳甲是殷春蒙恩半世榮加首守訓平生德
潤身花樹深情南北族桑弧大志古今人琴鳴篴奏斑衣舞雪藕水
桃宴樂身

族孫本亨

瓊筵錦帳對時新和氣融融甲戌春無事林泉開壽域太平日月作
閒身紫霞酒醉長生術南極星明一老人高年自許同龜鶴五雲異
彩照斯辰

族從松圃夏祖

極星放彩近生新花甲重回舊仲春天命賦來仁善性仙方學得健
康身德施宗族無雙士功及先塋第一人按瑟聽篴開壽席祝岡肖
子舞蹈辰

族從仁書

客滿華堂彩舞翩神仙不遠壽觴前會看龍抱抽金笥佇待龜遊擊
玉蓮琴瑟相歡偕老日埧篴湛樂共和筵數株偃蓋庭松樹幻作冥
靈五百年

族從仁喜

福在於人壽在天懸弧佳節又今年獻觴酒氣傾甘露舞袖風光轉
瑞筵老鶴靈龜兄弟樂走麟飛鳳子孫賢麻姑摘送瑤桃實荊藿春
光滿地連

族從然浩

烏帽飄然鶴髮新重回六十一年春仁而得壽能爲富市不售名自
愛身琴瑟雙調如好友埧篴相對共閒人令男賢婿稱觥席觀者爭

來頌此辰

族從赫祖

德星自耀壽星新絳甲重回甲戌春
筮仕曾潛郎署僚治家剩作素封人
事在祖宗能繼志友于昆弟善修身
後我五旬俱壯健湏臾願見太平辰

族從昶祖

五宗老孫子質朴古人風在家常早起
憂國願年豐尊性於斯適賀詩與彼同
箴吹琴鼓席舞彩樂其中

其二

花樹東風二月新紅顏白髮晬筵春
垂後義方惟盡力追先誠意詎抽身
少作清貧勤儉士老成饒富健康人
棣傍棠下無窮樂鼓瑟年年共此辰

族從然忠

敦族誠心老益新天令花樹永留春
相傳詩禮仁居宅自樂圖書德

潤身事業勤成知此日風流非俗似仙入堂中旨酒琴聲外膝下斑
衣共祝辰

族從範祖

蓬矢再辰咸頌穉年之慶花樹同春益讚壽盤之宴時維桃華序
屬竹秋蓼莪詩中必感劬勞之恩杞菊枕上須醒幻化之夢壽域
日如年華堂春似海白髮兄弟湛樂斑衣兒孫承歡五湖明月圖
末真境三山紫霞盃中醉色入皆欽羨孰不歎辭勝友羣東南之
美清福并封疇之祝身致財而義用墓碣祭庄博施恩而周及族
睦姻恤溫良恭儉若將終身氣凌松栢恆帶君子之節韻和琴瑟
漸昌室家之隨書襲儒林薛鳳荀龍世世籌添海屋碧藕丹臺年
年峩冠博帶堅守先聖之禮制鶴髮龜齡鮮見今日之風彩第叙
鄙情以祝遐福

惟人享福總由天推古看今罕此年遙憶春光花樹城爭趁歡意彩
衫筵蓼莪篇上能終孝荊棣家中特有賢龜鶴呈祥鸞鳳舞滿門和

氣永綿連

族姪漢會

古甲珠花再發新華堂獻壽際芳春賀章成軻詩連璧靈藥盈箱瑞
護身吹笛鶴南飛舞曲騎牛函谷出來人寒潭之水深千尺釀得年
年祝此辰

族姪永會

懸弧舊甲歲回新正是清和二月春琴瑟華堂偕老樂風波宦海退
休身萊衣席上趨諸子珠樹花前會族人百里相思空有夢嗟吾未
得趁佳辰

族孫滋民

桃顏鶴髮俱相新古甲重回二月春鳴世圖詩爭獻席稟天壽福摠
兼身鈇樹珠闌花似海藍田日暖玉如人爲公但願年年祝無量遐
齡積此辰

族從承祖

嘉祥會期洞天明初度良辰感舊情苦歡誠似醒宵夢酬唱相傳活
畫聲荊花連蒂雙枝攬寸草報暉新葉生愧余幸忝宗親末面賀無
緣短律呈

族孫本綾

鈇樹生花鶴髮新流霞釀得滿家春鍊形應服丹砂水洗髓幻成金
粟身床上偕琴知大德筵前舞彩亦賢人嘉賓雲集稱觴際將此龜
籌祝晬辰

族從宅祖

甲是先天戊後天懸弧舊日即今年靈留丹石康寧術香動斑衣悅
喜筵百劫世間超俗伴三清洞裏逖跡賢崇先啓後心惟一所以君
家福祿連

族從羅菴然海

錦史弧筵瑞色新吹簾鼓瑟一團春生來安土能知足老去離鄉是
隱身專力敦宗謨此世守成裕業述先人同根花樹畿湖遠恨不相

從賀慶辰

族孫聖謨

蓋自生民以來孰不欲華祝箕福之備吾一身有之也何宇宙千萬年寥寥其鮮歟此聖人所以有天地之大猶有所憾之歎也若是其壽富貴畢至之鮮況復期其康寧之起羣而好德之裕裕人聽聞若大父翁之備有者顧亦幾人也吾知得此鮮有之祝福必有其所以也天道無親常與善人而顯報不忒厥類惟彰則翁之壽富貴康寧其攸好德可知焉宜人人欽誦其德而思齊也二月二日即翁之重弧之辰族戚隣朋爭致賀章若瓊璋如錦繡之堆積几案不見是圖抑何勝歟聖謨忝在族孫之列雅荷庇眷揆以情禮其不可昧然嘿過也明矣猥述數言非敢望其附驥續貂聊陳微悃而已焉頌曰

瞻翁晚卜曰惟嘉會洞名嘉會鍾毓淑氣人傑地靈寔居得所翁壽而康寔賴其佑子孫逢吉斑斕飾喜一團和氣盈溢門楣老少咸集

歡娛無央我阻賀席遙獻心頌厥頌伊何綿綿無疆無疆綿綿誕膺
克昌

族弟竝書

偕老康寧福祿新團欒花樹共長春承順兒孫能養志翁如兄弟克
修身追先事業稱當世濟衆恩功暨萬人願將東海無窮水酌盡年
年獻壽辰

族弟槃書

丹萸二葉歲華新積善高門和氣春閨中琴瑟偕歡友庭下芝蘭彩
舞身桑梓湖鄉安樂地烟霞京洛太平人白首文章常隸詠萼樓同
卓醉佳辰

族姪綾會

端日祥光晚更新逢時花甲又兼春承家先世終成業修德平生自
潤身漢陽山水清閒客盤谷鄉閭老大人蘭茁棣華琴瑟和盛筵共
祝樂良辰

族姪璇會

祝壽萬千日又新新新物色際中春以仁繼世宜吾族有德如公潤
此身管絃聲裡盈詩酒花樹影邊來故人太平時節昇平樂六十一
年重甲辰

族姪麟會

極星來照瑞光新偕老康寧六一春才秀師門曾就學名登郎署晚
榮身清閒京洛從香社慈惠鄉隣救衆人肖子賢孫稱觥祝弟兄酬
酌此良辰

族姪鳳會

南極星垂花樹新枝枝葉葉帶長春偕韻和情瑤瑟友稱觥戲舞彩
衣新看彼席中高坐老果如天上升仙人一門遐福多餘慶盛宴何
須但此辰

族姪宜會

種德公家景福新甲花初度仲陽春風月名樓吟詠士烟霞遯域健

康身繞庭彩舞趨賢子滿座華箋會賀人瑤琴頻奏塤箎和和氣融
融永好辰

族從傑書

惟君孝友出乎天天佑仁人享大年老於南極星之下壽則東方朔
以前乃得人間兼富貴始知地上有神仙瑤瑟調兮常棣詠無量景
福又延綿

族從然澤

噫自以賤見察其古今論其人事則夭者多而壽者少或有壽者
而五福俱全者鮮矣五福之中難得者富也富而好禮尤難然則
一世之生長老歸豈非春夢中醉生耶當今之時五福兼備富而
好禮者倘爲誰哉不知也不知也竊想惟錦史近之矣何者錦史
自少時慎默寡言而不失孝悌背郭頃田勤力其中朝出晡夜歸
讀儉約齊家稍有贏餘中年已過能爲撥貧而極於養生幾至末
年奄遭兩親喪事以孝致喪送死無憾三年不改父之道又其弟

極誠侍墓一境之內知禮之家莫不讚賞由是以來爲先立石之誠心九族分財之厚誼洞里濟恤之愛情無不深極人或致賀則錦史却之以爲吾之先親生時有志末就命于不肖遺教之事非吾之功也苟非天性之孝豈能然乎故曰近於好禮矣元來錦史之先考與先祖考皆有孝行世世相傳豈不欽歎哉然而錦史所懷有一焉琴歌三闋未得弄璋故時人謂之以此人之德未見一嗣豈有天理哉古人以鄧伯道爲歌今人以具錦史爲歌云云雖然猶父猶子豈有異哉猶子爲嗣二孫入抱麟趾螽斯爲歌萬世及此二月二日即錦史之再度弧辰也一家至親蕃衍滿堂獻壽祝岡壯觀儀容不可勝記朱門桃李當塗之士洛中貴公子雙雙鳴珂而來躋蹕登筵祝賀紛紛是亦光榮轉此以來鄉社舊基又設此筵則遠近親疎諸族湖中彬彬多士聯襟齊會頌祝續紛賀章滿床鄉舍不能容真可謂稀世之華筵也洛雲湖月影相徘徊遂成圖畫盡入錦囊爲史主人翁之無窮別業於斯可見矣吁族

拙自以花樹之誼累見寬待而抵于今日心緒方何如耶只以一首詩拙言叙其萬一之情

花甲天時淡且新蒼顏皓髮欲青春難兄不啻亦難弟潤屋如斯兼潤身漢北城中超世客沔陽林下讀書人爲君願祝無彊壽恆似年年此日辰

族從慙祖

爾陵千載命維新大宴高開洛水春兄弟同居湛樂志夫妻偕老健康身慈悲涉世人如佛勤儉成家福有人賢子肖孫爭獻壽重重來甲願今辰

甥姪洪翰裕

詩曰孝子不匱永錫爾類子思子曰仁者必得其壽此豈非惟我舅氏錦史先生之謂耶先生天姿眞實無僞慎重溫默望之也儼然就之也和如好學而能成其功治產而能就其業德益高而業益廣此皆先生之渾然天性出於自然者也非力求於外而成者

也然而一遵家庭之教承順父母之意雖小小細微之事必稟命行之不敢自處也繼其志而述其事若非孝之盡能如是乎且夫積而能散姻婭親戚各得其所周恤濟施鄉黨遠近咸被其澤若非仁之至又能如是乎以此觀之先生之大德高行寔出於至孝至仁可知矣矧當六一絳甲之筵兄弟湛樂和埧和麓家室團圓宜琴宜瑟子姪孫婿羅列舞彩此乃先生孝仁之心根於天而天報之以福也然先生今日之壽非壽之邵也乃壽之始也今日之慶非慶之極也乃慶之始也將來之景福必臻於無窮之域矣豈不大哉甥姪年未七歲慈母見背且當菽水之艱歸依於膝下者二十有餘年矣先生愛而收之眷而教之且財而分之今之動用周旋莫非先生之所賜也既受教養之恩又蒙眷恤之澤恩深澤重而不能報萬一敢以數字文一盃酒獻祝於節慶之筵曰壽考康寧以躋遐域賢子肖孫繼述其業世世相傳益大家聲云爾至仁大德配陽春和氣融融百福新塏篴篴樂孔懷日琴瑟團圓偕

老身孝友相傳先世業詩書不負舊時人釀來無盡漢江水酌彼年年稱兕辰

甥姪洪天裕

遐年龜鶴住長春黃耆無彊白髮新爲仁有術能迎福修德無私亦潤身至孝根天承世業神方不老學仙人琴瑟和調兄弟樂子孫飾慶正佳辰

甥姪洪信裕

氣力康寧福履新溢門和氣四時春寵辱不關真達士清閒無累即仙人濟世仁恩皆種德治家規範自修身續續年年長獻壽六旬未必獨良辰

戚從李學冕

人皆天賦厥初生得壽由仁理甚明簡默周旋真愷悌沈潛言動在寬平裕後家謨靡不及追先事業已全成滿門和氣弧辰慶琴瑟春風共弟兄

錦里詩金

一宴畿鄉再得新吹成琴韵泰和春今見弟兄稟述業乃知福履在
修身晚年高躅隨湖棹是日酣歌共沛人從事追先兼裕後如君可
謂樂生辰

表從尹建榮

桑弓蓬矢重回新杖屨鄉園伴到春芝蘭庭下皆賢裔琴瑟閨中共
老身天上果因無量福世間豈意有斯人漢水洋洋流霞釀兄酬弟
勸樂斯辰

內從姪金華鉉

六十一年甲戌新斯翁華甲是仲春浩然氣像仁爲壽純古衣冠德
潤身文章繼世無雙士孝友傳家第一人和瑟共留長得樂同年同
樂正佳辰
爲仁必壽稀爲仁仁者云誰此老人義庄廣設惟扶族先業保全謹
守身寶瑟共和華甲日孝烏反哺碧桃花箋短律祝餘慶如一康
寧又吉辰

戚姪李應奎

庭冀二葉報弧筵極宿光生嘉會天塤篴相奏偕三樂琴瑟同和友
兩絃湖鄉明月修先業洛社風流寓晚年稱以春觥眉以介滿門飾
慶子孫賢

戚姪李應直

春二月回日二新應天休運設弧辰弟姪子孫湛樂宴康寧富貴泰
平身立旌豎碣推誠孝分土奉香及戚親星度無窮仙甲曆回婚餘
慶又申申

戚孫李世春

人生得壽有原因曾不在天本在人公道無形流化域其中厚賦必
由仁

戚孫李在春

依依曉枕不分真有一仙官下降頻今見高堂稱壽酒乃知昨夜夢
中人

戚孫李南薰

初回甲戌春數自是年春一二無窮算可升萬甲春

戚姪金榮昌

仲春初吉日華甲正佳辰閨範瑤紘樂庭儀彩服新湖鄉稱活佛洛社做閒人百歲無疆祝康寧老大身

高門華甲德維新彩舞聯翩玉樹春晚潤箕裘成此業早辭簪笏遜其身養來山水烟霞處擬作仙風道骨人賢弟仁妻兼共老更將遐籌祝令辰

姻弟洪正厚

稱兄呼弟誼益新願言同壽萬千春我亦猶存少年態君何敢作老翁身六旬元是非遐域此宴胡爲鮮幾人濟恤貧窮多積善綿綿餘慶又來辰

姻弟李建豐

鉢樹開花六一新蒼顏華髮擬青春儉勤治產名傳世寬厚交隣德

潤身在床琴瑟承君子聯枕塤篴對老人麟鳳趁庭能盡孝瑤桃二月最良辰

戚姪車世淳

玉京昔日降中春再設弧筵祝壽新華筵折簡京鄉友白髮超塵富貴身旌閭高揭尊名祖衫袖聯翩列孝人團會一門難盡得花紅柳綠際良辰

戚孫金永稷

瑤海碧桃結子春大開此席益新新賀蟬連續京鄉宅威儀壯觀富貴身籌花壽域多餘歲祝福華封已上人琴瑟塤篴同樂日斑衣黃襪舞令辰

七十七叟輔國詩南閔丙奭

生朝又屆仲春天兕酒淋漓慶祝筵不獨今年當此日也應此日又明年老去漸知琴瑟樂人來皆賀子孫賢爲君那得吳道手畫出神仙滿世傳

蕉西七十六叟判書南奎熙

偕瑟鶴髮含飴新玉樹敷榮郵駐春節屆中和初二日甲回六十一
年身持家克儉箕裘業接物團和愷悌人互答塤篪烏帽岸觥籌煖
屋讌芳辰

七十六叟判書石下金晚秀

高名漢士盛舉新喜幸如聞樂正春講禮今居嘉會地延年賸做閨
園身青邱昔日應多士白首文虹獨此人棣萼瑤栞兼玉樹好將三
樂湊弧辰

八十四叟勳山李起夏

鼓瑟和簾庭舞新極星方照際中春承先種德居移氣好古冠儒雅
飭身顧我幸忝姻婭誼捨君不見孝慈人病軀未進稱觴席遠頌年
年享此辰

前郡守弗須尹甯求

具公設弧之甲也爲酒以壽夫人對琴抱瑟而和如夫人左右侍

奉巾櫛丈夫子舞彩歌南陵女六人羅列于前時東風向善百花
未開一堂之內和氣藹如京鄉知舊既醉且飽瓊章瑤句堆案盈
箱皆善禱善頌之辭也余雖不文念公之德之福不可終於默數
行以序曰

壽五福之首 公有之夫婦百福之源 公有之子孫萬代之榮
公有之公之有之蓋出於仁仁者之必得豈非壽乎吾以是卜公
之壽耆而耄而至期子孫之子孫又皆如公則今壽域諸公又必
祝餘慶願公年年此日具此酒多多余雖不飲亦爲公十分醉也
序不盡言系次長筵原韻

孤甲甲年慶倍新長筵和氣駐長春宜室宜家親二姓難兄難弟似
同身曰康曰壽由仁德多子多孫合善人有酒有着皆醉飽良朋孰
不賀良辰

紫泉七十四歲叟徐相春

綾城舊閭壽星新弧席重開二月春湖外曾聞蕭散跡洛中今見健

康身牽絲歲久感昭代鍊汞功深希古人菊竹梅蘭和氣動樽前賀客醉佳辰

參判三然七十八歲叟李舜夏

弧辰重屆仲陽天喜見華堂獻壽筵孝友愈深聞後世家聲不墜卜餘年琴瑟共調夫妻樂棣樹交輝子孫賢滿院清風依竹栢兕樽慶賀更相傳

前宗正府令李起鏞

華堂二月設弧筵綠鬢韶顏宛似仙海屋添籌凡幾度南陔爲壽可千年家肥已見兄弟友子孝從知父母賢詩禮令名長不墜二孫克肖永相傳

晚松陵令韓敬澤

梅棣俱全蘭葉新鏡花正是際殷春名門詩禮由前世盛代簪纓老此身平地仙區非別界長籌海屋有斯人餘樽倘俟風光好會飲何時不良辰

前郡守心湖李範詰

煙花二月氣清新正值錦翁華甲春儒家規範平生志古制衣冠自在身友瑟吹簾湛樂日芳蘭苞竹不憂人仙鶴南飛歌一曲滿斟霞酌醉良辰

前承旨杞溪俞鎮泰

棣萼床琴老愈新一家長駐四時春湖山風月常留目城市林園暫闕身做官不求清顯地劬書能作富贍人爲君晚福先眉介此席尊門最吉辰

痴堂進士姜敷錫

傳曰孝者百行之源又曰友于兄弟施于有政當此丕變榛樸之世兼此二者之勲余於錦史子見之矣錦史承其先人遺業而爲家克儉克勤必敬必戒如處女之新嫁烝嘗之享承接之道洞洞屬屬有補而無缺譜牒之役先集之刊覃精竭力事已告功可謂有光先人之孝也與其季君友愛彌篤自湖戾洛暫不相捨如鴈

之隨如枝之連對床聽雨墳簾歡娛爲人所艷羨可謂兄弟睦家之肥也向所謂二者之嫌人所難行天之所以稟性於錦史而俾壽錦史者也其餘珩瑀琴瑟玉樹芝蘭非不貴也人易得之曷足爲錦史道也蓋孝友四端之發諸福之所聚未有孝友而不享其福詩云豈弟君子福祿攸降又云宜兄宜弟令德壽愷古之人豈有欺哉余與錦史善深知其孝友之行以是舉觴而賀長筵之右未知錦史倘莞爾而不辭也否繼之以詩曰

烏帽綈綈鶴髮新康寧六十一年春不知銅狄摩挲手應作岳陽飛過身問食無飢賢舍弟如賓相對貴夫人中和翌日懸弧席蝶舞蜂歌賀晬辰

前承旨耻齋李範世

知子康寧厚賦天六旬不老設斯筵生朝會在艷陽月來歲分明再甲年床調琴瑟偏多誼家旺兒孫揔是賢人語紛紛瓊軻賀介眉餘酒好相傳

前叅奉溪庭金永杓

駝顏鶴髮倍清新鐵樹初回六一春
家道勤孜眞樂事世情淡泊是安身
同歡日值踏青節留飲夜長嘉會人
斑彩瑤琴和且翕棣花韡韡護良辰

進士李雲鍾

花生古甲盡中新正是風光二月春
鶴髮彪眉稱上壽仙形佛骨作閒身
渭川垂釣知今日商洛園碁豈別人
孫葉子枝同琴瑟需雲瑞靄最良辰

書山前博士成 塤

天之報善舊維新德蔭始知長發春
捐重義庄修睦地功多肯構積勤身
蓬桑追感劬勞日蘭竹生成具慶人
北斗文章南極壽闌干觥輶耀星辰

前叅領李冠珪

春風和氣滿堂新賸得高門不盡春
佳子孫羅珍重態老夫婦樂健

康身盛稱回甲遵東俗恭遇同庚祝聖人既醉壽樽兼飽德如雲賓
客賀良辰

前博士心齋李範柱

百世相承德蔭垂仁人必壽見公知政當壽域無疆日方及羣生自
樂時弟敬問衣常樹背妻賢舉案每齊眉斯筵一歲相先後姻誼偏
深報賀辭

前叅領朴用來

舊日桑蓬今又新頌君華甲在殷春太平壽老優游歲大吉家成節
儉身養志怡顏孝兒子齊眉舉案賢夫人我知無量霞觴醉南極年
年放彩辰

前郡守知村姜信英

洋溢君家春氣新好是又是優陽春桑弧蓬矢再懸日鶴髮龜形偕
老身積累祖先豐舊物可當兄弟有誰人晚交既厚芳隣近但願年
年賀此辰

前郡守吳汪根

絳甲賢門鍊樹新花開六十一年春青氈詩禮承先蔭白髮簪纓顯
自身分土普施來活佛鍊金遇壽見真人塤箎吹後瑤琴奏彩舞瓊
盃適良辰

前叅奉小樓李崑應

極宿西隣放彩新盈門和氣自生春仙丹安用仁爲壽錦繡兼功德
潤身棣萼連枝有是弟瑤棗對案宜其人且待年年開此席柳舒花
發最佳辰

前郡守菊儂李淵會

萬福君家與日新復回孤席鍊檀春富云架矣傳之子德不孤兮潤
厥身吹以塤箎相好地合如鼓瑟太平人曾年郵職非初志勇退修
齊到此辰

進士艮山金容瑤

極婺雙星萬八春惟君享福理由仁溫良處世曾無疵勤儉成家老

養真常棣發華兄弟樂螽斯振羽子孫代非徒賀祝今朝已海屋花
籌積壽辰

前主事蘆隱孟夔

東俗重週甲週甲者生年甲子復週之謂也大抵人之壽必自六十始故記稱六十曰耆亦杖於鄉而不與服戎又養以宿肉備以歲制古者敬老之重如此而東國亦以六十一歲之週而復始爲稀貴之慶於是乎其子孫必設讌稱壽而飾喜焉今年甲戌二月二日即錦史具主政六十一歲回甲生朝也其胤乙會甫特備饌而設慶壽宴蓋於是日也琴瑟之好埤篴之歡衍衍如也趨庭之孝筵室之奉愉愉如也衣食足以適其體居處足以養其和且以平素之範義型善泐身浴德親戚稱其賢知舊服其義隣里蒙其澤鄉黨慕其名庶幾乎兒童誦走卒知而和而唱之同然一辭亦能修鍊精華榮衛不替語其風采則雲鶴風蟬聽其言論則玉韻金聲將見極宿精光相輝映乎靜好之堂晨昏之席以八千歲爲

春秋而康寧壽考可爲人中之瑞也聊以栢悅之心不揆僭妄以
一首荒律賀祝曰

甲戌重回舊甲新居然六十一
年春溫溫良玉千磨骨鑠鑠精金百
鍊身壽福難知知以德神仙不見見
斯人竹兼常棣梅兼鶴列宿郎
官嶽降身

前叅奉全亨默

祥輝南極載回新
嶽嶽弧樽謫謫春福祿何非求自己神仙應是幻
前身瑤絃彩服團圓席白髮烏巾蘊藉身分付百花
湏早發清明時
節即生辰

洪範厚

人之欲壽同情然也人雖壽而不讀數行之書又無尺寸之善草
木其胸倒行而逆施者命之曰陳人或皮俗中雖儲得多少文字
甕牖繩樞百憂嬰其心萬事纏其身者命之曰窮人如此輩流雖
錢鏗曼倩之壽人不謂之達尊而自苦亦甚矣必湏山林之收田

園之糴足以平章家家裕餘之糧周貧恤窮然後聚神端坐白蠶絲牛毛之理推以天德王道之大童習而白紛如也則語諄諄有味髮垂垂如銀人莫不愛慕欣悅而曰斯人也壽壽如是而後乃可貴乃可稀也前主事具大兄老人詩禮家也文學夙就德業早成竭力耕田供爲子職行有餘力則以學文古所謂朝出耕暮歸讀古人書者也如此積四三十年荒頓茅廬漸化爲攸芋之屋疏食菜羹漸化成玉飯珍羞心神筋力之費不其憂憂乎難矣哉微官着帽不足以爲榮然猶可免白面書生此蓋晦名滄桑退隱宦海之古意也今也廣廈足以庇天下寒士鼎餼可以接三千賓客有朋則進酒肴詠歸則講道書逍遙一世睥睨天地懿乎美哉豈不偉耶歲甲戌二月二日即其覽揆辰也晴初日永氣爽天開肖子賢抱營辦旨物舉萬年之觴九如三祝交陳于前南鶴西牛嘉會于洞真德門之盛慶人間之稀事曷不雲賀萬萬也然而追憶程夫子之所訓自不勝劬勞之感隱然有不悅之態苟非根天孝

慕至老而不衰者安能喜而不喜悅而不悅哉夫孝爲百行之源
而行仁之本仁者得壽不言可驗而琴瑟偕和埙篪湛樂玉樹騰
芳麟抱生角安享壽富貴三字此乃前日孝弟且仁之所感者也
陳人窮人之壽何足道哉京鄉士友以金石詩句錦繡文章餽辭
盈箱如余不敏安敢妄擬於善頌善禱亦不敢以不文自止故敢
誦三百篇中數句語而頌之曰樂只君子遐不黃耇孝子不匱永
錫爾類以是獻焉助舉萬年之觴云

眉壽長春二月時添籌海屋日遲遲鄉關身致千金富洛社人傳萬
首詩滿室融和妻子好連床湛樂弟兄宜西望遙祝綿綿福麟抱又
看鳳出池

進士俞鎮晚

嘉會洞中賀語新綾城和氣永年春昇平煙月曾經夢垂老江山自
隱身錦瑟和音偕女士香蘭生色襲家人兄酬弟勸何辭醉無窮樂
事在晬辰

前叅奉元客旭

風儀溫雅德兼新
復見生朝六一春
治室惟儉寬接物
奉躬自薄厚
施人和盈棣院欣
同老樂在栞床肯
配身爲賀斑衣爭
獻祝公家令
慶適良辰

前主事又夢李泓珪

嬰鑠是翁鬢髮新
滿堂和氣一團春
床頭瑤瑟宜其室
壽域烟花老
此身儒雅風流名
下士翺翺志趣意
中人德門餘慶今
來賀重設弧
筵二月辰

進士竹軒徐廷旭

重設弧桑絳甲辰
盈門和氣駐長春
箱藏黃卷開來學
爐煉丹砂善
護身孟案齊眉湛
樂室萊斑繞膝孝
供人霞樽筍脯嘉
賓席此會無
窮二月辰

憂堂權東鎮

絳甲重回極宿新
花明鏡樹駐長春
行仁已得無疆壽
守拙乃全好

命身家傳華胄承先緒業守青氈做善人庭趨彩服床偕瑟滿酌紫霞娛令辰

前主事金舜濟

高門遐福日維新鍊樹花開二月春山中宰相因爲號地上神仙即此身玉樹羣芳賢子弟琴床偕老淑夫人一室康寧兼壽富君家何日不良辰

又清李春世

君家和氣日新新六十年過又一春富貴清閒知自足文章才德備於身福田雨露均霑地壽域烟霞不老人依舊申菴山色翠年年應似設弧辰

尹炳奎

孤筵六十一回新綠鬢朱顏賸駐春日在降婁迎令節居曾畏壘識禔身百年偕樂真雙壽三世俱存問幾人復有紫荊連鍊樹並時吐萼作花辰

金在元

設弧甲戌更來新二葉丹莢二月春想應京洛多諸益况復湖鄉樂
此身同衾棣屋孔懷日彩舞蘭庭祝壽人偕老閨中琴瑟友生朝前
後摠令辰

進士海雲金壽卿

世孝君家降甲年雙仙對坐載陽天蓼莪應感懸弧日鸞鵲爭趨舞
彩筵早謝切名塵慮遠晚成德業頌聲連聊知盛况無過此宜付人
間繪事傳

洪昌基

道氣充然老益新童顏鶴髮住長春能潤身又能潤屋有德仁兼有
福人火棗水桃交進席龍鱗鸞掖共扶身黃流鎮日關雎樂多士闡
門祝壽辰

止汕李會駿

仲春佳節釀花天錦史先生設壽筵謀來海上麻姑酒獻祝人間鶴

髮年排蓐樓中兄弟樂芝蘭庭畔子孫賢施仁種德無量賀孝友家聲世世傳

李在哲

高門和氣復生新際此晬筵又仲春東方朔后延年術南極星前不老身宴安杖屨來來客祝賀詩章濟濟人回憶浴沂風雩事當年風味養閒真

徐永局

積善福家福日新先天花甲再逢春五湖千載財肥屋六行一生德潤身瀛池何必獨仙境彭祖不一稀世人孝胤稱觥斑舞席滿堂喜氣幻佳辰

李範楨

仰看南極壽星新和氣融融二月春嶽降年回惟大德里仁爲美達尊身瑟琴好合宜偕老卓襟相連篤愛人玉樹芝蘭歌舞地無窮樂事占昌辰

金鳳基

嘉會洞天瑞日新
晬樽滿酌漢江春
浮榮拋棄青雲志
晚福康寧白髮身
三山壽域非他地
萬石汾陽又是人
忘拙構詩餘慶祝
年年此席此生辰

洪奉裕

福祿與同白髮新
天時公德共爲春
胤孝孫賢無量業
棣華琴樂太平身
積能施散眞君子
富且仁兼是大人
好托花籌騰賀頌
千萬多日又來辰

南命祐

福湊高門逐日新
歲逢甲戌又逢春
公心閱世猶全性
樂意治家不老身
西出駕牛疑學士
南飛歌鶴問誰人
床琴相和連常棣
孝子賢孫舞此辰

南相允

仁之爲壽壽由天
天必寬公富貴年
解譽鄉隣皆頌德
喜懼子孫盡

孝賢墳麓湛樂常無厭琴瑟芳緣又得全賀酒君家春氣早碧桃花
發露圓圓

李爽九

重逢舊甲夾鍾天極宿光生彩舞筵父母劬勞惟此日子孫喜懼亦
今年却羨棣原兄弟樂從知梅閣夫人賢公之餘慶無量賀赫世家
聲孝友傳

洪昶裕

安享六旬有一春孫枝子葉日抽新上界神仙莫不悅汾陽萬石自
全身修德由來多百福吉祥元是降仁人天報丁寧餘慶大公家積
累驗茲辰

李種喆

却看令子彩舞新爲是尊翁六一春鍾來環宇中和氣統計平生穩
藉人稟天多福能潤屋處世無嫌善護身二月東風花樹裏塤篴琴
瑟設弧辰

尹炳台

高門華甲日重新白髮六旬又一春
貴能兼富因多福德是由仁自潤
身詩鳴洛北非凡士星耀天南降
老人瑤瑟床前翻舞彩滿家和氣
際良辰

南相薰

鉞樹花開甲戌春君家大慶際佳辰
青牛西出呈圖客白鶴南飛弄笛
人寶瑟延年和樂極斑衣愛日舞
趨頻流霞釀進盈盈酒弟勸兄酬
到幾巡

李胄魯

重逢華甲吉祥新稱兕弧筵際仲春
南極星輝當此地西方佛界幻前身
江山風月長爲主福祿文章復見人
瑤琴斑舞兼篴樂三清仙子降生辰

李道勳

碧桃二月復回新和氣呈祥不染塵
弄笛十年論舊契抱琴幾日送

陽春儉從淳俗先生德惠及貧窮鄉黨人遠涉江湖三百里祇因文
句賀良辰

沈星鎮

種德君家福慶新熙熙壽域駐長春一生孝友承先武萬石汾陽作
後身彩舞趨庭能繼志瑤紱在御是宜人兄和弟翁賓同樂海屋添
籌祝壽辰

李啓永

海屋添籌綠髮新弧筵重設滿堂春儉勤已得能知足毀譽無干獨
善身棣床篤友稀今世耨饁相賓似古人玉樹庭前嘉客至南飛一
曲奏良辰

海觀趙東泌

團欒花萼畫樓新錦史懸弧際仲春蔭路先天添一命蓮臺此日化
前身桑梓申菴傳舊業風雲洛社隱斯人梅下琴張蘭竹秀文章世
世耀昌辰

金哲濟

歲得新元月又新初回六十一年春弟姪子孫湛樂日康寧富貴太
平身平生無損寬弘志鄉黨皆稱愷悌人孟光教進朝雲酒伴醉高
堂樂此辰

趙珍九

瑞日玲瓏賀語新正是鍊樹重開春節勤有度能成業榮達無關作
逸身和氣滿堂琴瑟友韶顏同卓弟兄人聊將祝樽爭先進憶昔懸
弧在此辰

洪續裕

六十春過復一春春來物物益新新孝以追先仁以壽敦於睦族儉
於身一門團樂昇平世五福俱全老大人蘭茁莠和兼友瑟綿綿餘
慶自今辰

安鍾文

降甲衣冠坐一人人如白玉玉無塵老閣雅香梅吐雪滿庭秀色竹

噓春綾城喬木傳家勢盤谷脩林遜世身物外仙庄難記得天工神
筆畫良辰

崔亨濂

公今稱甲設弧新和氣氤氲六一春南國花籌初度日西河仙侶再
來身鳳瑟依連偕老席鯉庭陪立喜懼人賢弟令孫爭獻壽德門餘
慶亦良辰

俞鎮壽

鶴髮童顏風采新正當六十一年春高標已自超今俗儉德依然見
古人酬唱塤箎和滿室享來誠孝素由身知應未艾津津福稱慶何
庸但晬辰

李燮

極宿星光照德門百花佳節設花樽官微猶貴前朝職身老應知此
日恩琴瑟在床夫與婦芝蘭繞砌子兼孫從今遙祝無疆福世世斯
筵且願言

成章煥

仲春佳節設華幃六一弧筵頌九疇
早歲芳名登蔭籍晚年白髮算
花籌寬柔仁孝天增壽恭儉清閒世
鮮儔謝鳳荀龍餘慶大福祥難以
片言禱

前主事劉秉魯

蓋人之難得者壽福也公能兼之繞
庭彩舞岡陵擎祝豈非由仁
以得乎生亦丕擬叅末仰觀盛儀適
以感冒蹲坐未果敢此拙構
先呈以詩

君子懸弧慶日新新年和氣政良春
三千古甲云誰老六十邵齡有
此身常棣芳華湛樂地瑤琴山水康
寧人岡陵祝福繽紛語繞膝兒
孫獻壽筵

進士眞園李宗承

再逢甲戌仲春天極宿德門有此筵
棣萼交輝同樂日瑤琴和調共
延年岡陵壽宅親朋集詩禮君家子
孫賢滿座花樽爭慶賀應知善

事無彊傳

敬山韓祥東

仁得芳名壽益新高門大宴好逢春家聲悠久全成業世事多遷穩
養身舞彩趨庭承孝子偕栗御室樂宜人鵠原和氣兼麟趾昔日郎
官坐慶筵

尹柱憲

洛城壽席見聞新六十一年二月春稼穡曾知辛苦力簪纓又有富
榮身蓬萊方士今方士南極老人是老人車馬聲聲因祝賀滿堂和
氣自良辰

月塘南相規

壽富康寧又日新漢陽城裏一家春荊園彈曲雙和瑟常棣聯華二
老身座中賓客盡名士膝下子孫如玉人渾室丹心歸善祝清明時
節際良辰

金正烈

蟠桃樹碧午陰新宇宙悠悠春復春南極明星偕老宅玄園淑氣鍾
英身叢蘭郁郁斑衣舞一座圓圓獻壽人爲賀君家多慶福年年斯
日作佳辰

前副尉許璣

放梅舒柳物華新花甲重回二月春福從天降平安宅壽以仁成篤
實人逍遙蓮葉靈龜術棲息偃松老鶴身賀章頌語傳隣里況是生
朝吉慶辰

李璋憲

賀具仁兄乙會 春堂壽宴

人生一世所樂何事父母俱存天下之一樂也事親之際所願何事
無彊之壽是也今吾兄有此天下之一樂春府享此無彊壽焉積何
善修何德而有此莫能加之福力非天所佑神所助安能致其然歟
而況壽宴適開于陽春一團和氣鬱鬱焉葱葱焉草木羣生之物如
助自樂之聲螟蛉之功能成繼述之職鵲彩之舞供獻和悅之情且

遠近賀章不啻千百咸曰大哉積德餘慶仁者必壽損友獨在殊邦
夙聞慶宴之報不勝感喜依望遠天千萬無疆拜手心祝

李鎮石

南天雙曜放光新重屆闕逢六十春浮世榮名花後事平生圓滿月
前身來賓濟濟爭登席賀語紛紛艷羨人聊以荒詞爲獻祝德門世
世有斯筵

崧南散人朴倫

壽席團圓速客時珠花春返舊千支眼明兼住紅顏潤身健全無白
髮悲北斗盃深星算祝南陔詩入玉笙吹斯翁晚福由天爵從此餘
齡遠可知

又峰安鍾禹

聞君華甲壽筵開我亦明年有此盃人老稱仙何物者鬢霜只恐鏡
中來

前叅領石雲申國均

壽星遙與福星新錦老弧筵值仲春摩詰圖中開別業淵明記裏住
前身斑衣繞膝吉祥宅瑤瑟聯床湛樂人鶴髮烏紗風韻好同庚賀
語趁花辰

韓奎東

棣樹亭亭玉樹新滿庭和氣漸回春存心德義能容物歛跡雲林靜
養身三千大界無量佛六十一年偕老人爲賀君家多積善佇看慶
福有餘辰

安鍾武

一片仙庄物外新有誰不翫甲花春騎驢遙見揚鞭客渡水應多理
帆人林泉寂寂清閒跡鍊樹枝枝富貴身相望畿湖知不遠君家樂
事值良辰

前主事申學秀

鍊樹花開瑞日新韶顏白髮懸弧春平生崇儉成潤屋到老愈堅得
鍊身德業繼承傳世物雲仍昌熾獻盃人琴瑟墳簷一堂樂暢和二

月是良辰

渭村金黃中

懸弧舊甲慶維新極宿生輝斗建春富而好禮名傳世壽必由仁德
潤身君家先世多今日吾黨遺風見若人鶴笛南飛樽酒綠纈紛賀
語樂茲辰

李承克

慶福尊門日日新甲花重發六旬春彩衣翻舞繁華室寶瑟粧賢安
樂身文章從古無雙手富貴當今不後人嘉友濟濟如意會飲餘祝
賀送弧辰

李在奭

壽福兼之頤養人紅顏綠髮綺羅新登席遐壽千歲日滿堂和氣四
時春勤儉成家看潤屋溫良處世頌傳隣仙方不待三山藥後甲長
期偕老身

南極祥光六一年人間壽福最高傳芳隣始接青雲外彩舞相趨白

髮前今年今日常常在令德今名世世傳海屋添籌從此後高門餘慶子孫賢

南廷觀

君子聲華老益新泰和儀範有長春切磨交結能容物勤儉治成不爲身城市元非寧靜界風潮猶作笑談人滿堂獻祝千年壽斑舞兒孫喜懼辰

李參珪

六一光陰二月來滿斟霞酒客登臺小星長照瑤琴樂常棣湛和彩舞回繼世簪纓華閭顯終朝裘笛錦茵開奎仙不老人間在詞賦江南擅異才

南岡蔡昇默

玉麟生角壽眉長彩舞管絃獻壽觴百歲增延仙世界一官早拜舊朝堂好鳥鳴春開錦繡明窓輝日爛衣裳子弟扶携賓客賀漢陽人是摠隣芳

桂山李敏泰

中和節翌朝天回華甲之日降寅之辰綠髮具慶黃穉登筵稱彼
兕觥眉壽萬年敬惟天賦至仁素性寬馭奉先思孝教子義方雍
容湛樂琴床棣座之間壽可與喬松偕仝翺翔乎物表裁詩以勗
其遐祝之意

春水已泮瑞暉晶彩服前筵壽酒行到老情深瑤瑟樂平生友篤棣
花明家和萬事皆如意器大一官何足榮楸隴梓鄉多繼述感君仁
德遂初營

同心同學又同隣入洛居停問幾春擎祝錦翁千萬壽琴碁詩酒樂
清真

李炳

懸弧舊甲此留期和氣滿堂湊新祺南飛曲放鳳門迴極宿輝臨鶴
髮垂梅閣進供金掌露斑衣傳誦白華詩恆河大算無量祝從此平
年奉壽卮

前主事鄭壹燮

在昔論詩者必以康寧並稱若處世而遭逢患難或身有疾病而呻吟或貧賤勞苦而長抱戚戚之憂者其人雖享期頤之壽奚可以稱壽且康哉惟大君子則正心清和修身謹行聽天攝養無一朝之患節嗜慾慎起居無疹疾之苦富不淫而貧不移隨遇而安常懷坦蕩神遊物外衆玄之域如是者心氣寧而身體康廼知壽考之爲可貴也今吾友錦史子之回甲在闕逢閏大壯之月桃李之春也于斯時也風日和暢室家團圓有客滿座有酒盈樽京鄉名士多以詩文賀之余雖不文豈可無一言以酬知己也竊惟孝爲百行之源萬善之本惟錦史子之難兄難弟之孝友也根於天性而非勉強而行之故宗族稱孝焉鄉黨稱悌焉雖云法家之承襲然於公之極孝至友有史以來不易得之卓異也天分甚高好惡公而取捨明四時之氣無所不備愛敬由中積而能散富而好禮孺慕之誠至老彌篤身健氣旺不減於少壯之時琴瑟在御芝

蘭滿庭晚景清福世所稀有之門也此豈非積於前發於後乎余
與錦史爲友道之重而不渝故躬造蕪辭而賀之焉乃爲之詩曰
完福由來必受天老萊以後有斯筵碧桃子結三千歲黃耆甲回六
一年和氣融融夫婦樂頌聲藉藉子孫賢塤篴共席團圓慶爲把新
詩賀語傳

李建鼎

君家五福摠由仁此世矧兼富貴身佳節重逢丁卯月紫霞好上甲
花春芝蘭滿室香時動琴瑟調絃韻日新積善高門餘慶大京城復
見綾城人

東蓮李鍾玉

極宿盤宮光彩新還鄉作伴洛陽春捐庄施澤名傳世處義行仁德
潤身隣里歎情邀耆老風儀脫俗降仙人舞斑調瑟塤篴樂和氣盈
門迨令辰

李道一

世世同居弟及兄長春花樹一家成趁庭宵子呈斑舞滿座佳賓獻
華觥申菴寺靜祥雲集國賜峰晴瑞日明從知積善多餘慶無彊賀
祝露真情

晚松金鍾秀

折簡招招飾喜新君家稀慶在中春吹簫調瑟仁爲壽磨玉鍊金德
潤身一幅溪山傳世地萬坪稼穡廣庄人仙醞從此多餘醉知又年
年有此辰

秋玉李鼎義

壽酒洋洋到處新湖南春是洛陽春西天剩得無疆福東國初看不
老身兩地續紛來舊雨一書鄭重速親人羣仙自有蓬瀛會稷事相
修卜此辰

月城李鍾麟

昨夜吾鄉瑞色新先生六十一年春已知南極星前老正是東方朔
後身簪笏趁朝傳聖世箕裘守業養閒人籤鏗多子應非晚慶福元

來自有辰

南丙熙

六十一年初度新賀樽交錯滿堂春瑞星南極今垂世老佛西天更化身古宅江湖相繼地名園京洛晚居人棣華玉樹瑤琴動和氣盈門樂此辰

醒石李國憲

夫人家之產有承世業而守之者又有自己而致之者但知其守其致不知其用處而用之何足爲貴乎故傳曰富而好禮又曰德潤身不知其禮不知其德又何足爲美乎故疏太傅得千金之賜而語之曰賢而多財則損其志愚而多財則益其過每具酒食請宗族故舊而盡意歡娛范文正公買置姑蘇義庄以養貧族傳爲後世勝事向使疏太傅范文正公徒守其財不知其用豈可曰富而好禮德而潤身乎吾友具君錦史承其先君之業律身清高去華崇實節衣貶食益廣其業可謂善述先志也及到晚年亦知疏

太傅范文正之勝事救濟貧朋賙恤窮族及其屢世先墓修石儀
置祭土其他樂善好施凡百施爲罕今世之儔也今當桑蓬舊甲
身健氣旺不減於少壯之時亦非好禮而潤身者乎琴瑟在御埙
篪相和且哲嗣遊學和東益廣其志尤有方興未艾之像門內同
堂之親遠近故舊咸集觥筵賀語紛紛不佞忝在席末略伸其情
以表世好之誼焉

韶顏華髮更看新絳甲重回六一春優惠貧窮多種德獨行恭儉自
安身樽前永棣_湛和地床上調絃貞靜人願把弧絃仍繫日君家永
永住今辰

金範九

積善高門餘慶新和風壽域太平身齊家雍睦湖鄉士繼世簪纓洛
社人到老常棣同白髮向榮寶樹帶長春斑斕子孝兼偕老動地頌
聲繞四隣

東愚李範植

公之初度命維新極宿祥光照仲春花樹同原觀世德玉蘭前砌盡
誠身衣冠濟濟鄉隣客氣貌堂堂伯仲人萬壽無彊來賀祝羽觴飛
醉樂生辰

李範根

惟公齒德日新新節屆中和六一春家全孝友無彊福壽且康寧自
在身盤谷林泉棲息地洛陽花鳥醉吟人燕辭賀祝弧筵末孟案萊
衣圓樂辰

醉雲姜大潤

天回舊甲日維新千歲碧桃今仲春老去穩成頤養德閒居仍作太
平身斑衣戲舞嬰孩子瑤琴湛和壽福人常棣花前孫抱玉華堂瑞
色此良辰

梅下李相郁

錦史大仁花甲新弟兄烏帽醉長春治家勤儉平生志修德康寧自
潤身古宅居湖傳屢世老年遊洛做閒人滿天佳氣清明節彩舞趁

庭獻壽辰

李世淵

梅棹初返甲花新占着六旬一箇春富貴須知圓滿福康寧又是太平身
湛樂弟兄稀近世英俊子姪動時人調琴相和含飴坐瑞日遲遲此令辰

愚齋李台夏

朱顏綠髮鏡中新醉倒紅霞一酌春處處樓臺恆產客年年風雨獨閒身
富而無怨真君子宦不留情亦逸人偕老雙仙兼五福無彊萬壽祝弧辰

菊潭尹炳壽

德門休慶日維新六一年回二月春難爲兄弟湛和足老聽兒孫穩養身
完福如今占吉社遐齡從古在仁人洛陽壽爵猶餘釀復向盤村樂此辰

首陽崔德溥

福地盤村壽域新重逢甲戌一年春瑤琴同老和盈室玉樹成陰德
潤身西出楊牛塵外客南飛蘇鶴曲中人更看平地仙官在歲歲君
家有此辰

松坡成奎鋪

弧筵重設壽觥新洛社唐陽共一春治家自有千金足出仕曾榮八
品身梅閣奏和瑤瑟席蘭庭趨侍彩衣人抱孫兼享無疆福五湖圖
進此良辰

雲庵李鍾玖

一門花樹揔生新一斯筵際仲春無愁無事無量佛有義有仁有
德身此地丁寧看隱士三山何必訪仙人機池市下無窮水釀彼霞
樽醉此辰

崔光宇

舊甲重回今甲辰鶴齡鐵樹住長春治家勤儉能傳業處世溫良可
保身二月上旬稱慶地百花開日賀詩人沔陽古宅生顏色滿設弧

樽樂此辰

金用濟

綾城古宅設弧辰鍊樹花開媚早春屢世模楷多種德稀年壽考必由仁庭蘭郁郁幽香動園竹森森晚節新偕老堂中兼友篤天將五福付斯人

憲圖李容憲

凡人頌禱之辭莫不以壽爲先蓋生民所欲莫大於久視久視然後世間百事舉皆吾有苦樂榮辱始可言矣人固不可以不壽而實非人人之必得也雖然壽未可皆可樂壽而無諸福以享之則終歸於辱人而已其久視也良亦苦矣故古人之善頌者先祝其壽而必係之福曰五福曰百福曰萬福則凡天下吉祥善事皆爲享壽之物壽於是乎可樂人皆榮之也或世有壽而無福者亦或有福而不壽者若夫兼之者必其德之應也吾鄉具友錦史是其人歟甲戌二月二日即其甲子一周之生朝也置酒設席以飾京

華一家之慶而又不勝泉石桑鄉之情花月詩社之懷鹿車還鄉
更卜良辰而稱觴於是一鄉賓友咸集以詩頌之瓊琚滿案琅琅
有聲余亦速在賀筵之末作而頌之曰錦史福人也得其壽宜哉
蓋壽者供福之田地故古人之說福必以壽爲先竊惟錦史以其
多福寧有不得供福之地歟錦史居家有琴瑟之樂聯棣有鶺鴒
之懽一子鵠峙衆孫蘭茁勤儉成家而可作樂志之論筮仕成名
亦免北山之文歷數半生無一皺眉之事之人之福夫豈人人所
可易得哉賓友之頌禱固其所也雖然以吾觀於錦史得其壽福
自有其由若其像貌儼重其心性仁厚其治家有度其處鄉無忤
而文酒詩社到老優游顧一世之善士也此豈非孔夫子所謂家
富而愈儉之所教歟然則從此遐壽將與其行善享福無涯矣
豈不多哉於戲其盛矣夫略叙其辭冠于詩歌之首

種德福田供壽新紫霞白日碧桃春開花韓韓常聯棣如玉溫溫愈
儉身獨獻五湖陳共姪晚隨九老洛陽人萊衣斑舞瑤琴語一氣融

和二吉辰

歲重甲戌月重新
瑤瑟偕鳴寶樹春
鶴南飛去聲聞曲
鴈北連行羽化身
題名洛社誰爭子
尚德湖鄉是若人
向爲弧筵多未會
招招親戚更酬辰

李建永

四隣花樹倍生新
絳甲重回二月春
六親慕仰歡迎日
三達兼全老大身
優游漢北無雙士
再到湖南第一人
霞盃暗祝來來慶
慶福無量賀晬辰

鉢樹花開二月天
無疆遐福公家先
瑤琴偕奏三生樂
常棣同情一枕連
富貴兼全尊齒德
子孫昌大且仁賢
海屋籌之無疆數
筭餘日以晝如年

洪性德

仁人躋壽域
錦史漢陽春
孝悌傳家業
文章得性真
名聲無遠近
德惠遍疎親
清韻床琴奏
百年怡養身

金麟九

花籌海屋甲回新融融和氣際中春聖訓行來勤儉事仙方學得建
康身前砌斑衣仁孝子中堂錦瑟老夫人弟兄白首塤篴樂歲年
年享此辰

李建禹

錦史先生百福新居仁六十一年春陳脩湖上歸來跡函谷關中不
老身捐出義庄懷遠族養成淳默學真人臨樽爲祝螽斯福即見簪
仙有子辰

尹炳琮

天佑德門降福新和氣盈盈際仲春寶樹向榮方秀色棣花不老是
同身繁華洛社吟詩客富貴湖鄉得意人可愛君家餘慶溢此筵歲
歲設佳辰

李鍾純

始聞華甲在今春望裏壽山特秀新張邸世居曾得地姜翁晚達復

兼身彩衣庭下克賢子瑤瑟閨中偕老人園棣庭蘭餘慶大遐籌交錯際良辰

李甲憲

官冕相承詞藻新懸弧佳節又逢春校書成譜修先業戒酒寡言持此身南望舊居盤谷宅北遊今作洛陽人九如三樂詩歌發慶祝無彊獻壽辰

北坡閔載憲

舊甲重回命維新瑞光先到福家春惠施友族活仁佛吉亘子孫康健身壽矣龜齡非別物超然鶴髮是仙人棣花連藥偕琴瑟世世高門樂此辰

湖隱李種鋈

賀君景福日日新弧矢重回甲戌春奚但蘭交緣舊戚況今葛誼在吾身早遊洛社青雲士退老江湖白髮人吉慶德門和氣滿桃花二月此良辰

金在萬

從來齒德杖於鄉南極前宵放瑞光
少日才名追白傅全家孝行比黃香
偕音寶瑟臨弧席稱壽緋袍坐畫堂
滿地芝蘭誠孝極介眉更誦九如章

沈相顯

椿萱統紅柳更新六旬花甲再回春
廣開庄土先承業早取功名暫出身
傳家孝友曾聞世種德慈仁普及人
塢瑟和鳴兒舞彩慶筵盛設百花辰

鶴臯李建礪

天生富貴壽兼仁六十年來穩藉身
丁鶴千年曾化客甲花二月復生春
棣華聯枕雙香動螟養趨庭彩舞新
梅閣慶筵開次第發星極宿照斯人

鰲仙洪慶裕

龜鶴添籌舊甲新韶顏華髮住長春
漢陽山水逍遙客湖上烟霞老

大身到處慈仁多種德生平勤儉穩持身無量福祿天休至將此詩
辭賀壽辰

李建龍

京鄉宴會吉祥新萬石君家六一春和風氣爛熳氤氲地德義心存潤
澤身遙知天上遊仙客誤下塵間伴世人年年二月來未盡霞樽滿
酌醉壽辰

李鍾庠

懸弧花甲復回新時適陽和二月春孝友行仁義以路文章種德福
兼身極宿明光登壽域商山白髮見仙人琴瑟中堂看彩舞今朝樂
事最良辰

宋鍾樂

韶顏白髮鏡中新和氣君家獨帶春棣園同感劬勞日梅屋可憐偕
老身舊業傳來三樂地德音稱頌一鄉人此席風流餘興在何時何
日不良辰

成耆永

和氣德門從此新正當六十一年春應思父母劬勞日尤篤弟兄敬
愛身齊眉舉案瑤琴友祝壽稱觥彩舞人更祝君家傳世慶非徒今
日設弧辰

崔善溶

南極星精白髮新丹莢爲報甲花春聖代曾經榮顯職暮年又是富
豪身三生佳約偕琴友一片深誠愛日人埧簾相和麒麟抱瑞氣玲
瓏協吉辰

優山成大鏞

絳甲重回白髮新壽觴次第住長春敬兄司馬眞賢弟知己孟光偕
老身置酒相歡漢陽客還鄉復會汜城人玉麟又抱蘭庭下世世相
傳樂此辰

沈相烈

烏帽紅顏白髮新六旬回甲戌年春壽康兩得仁爲首富貴兼全德

潤身少時耕釣湖中月晚歲從遊洛下人恭弟賢妻孫又子弧筵重
設樂生辰

沈宜昌

弧筵再度倍生新洛社浮榮一夢春漁釣鑑湖持晚節文章玉局降
前身棣華聯若相宜友梅笑索同偕老人縱許斑衣供戲舞蓼莪應
感劬勞身

韓明東

偕老高堂彩舞新重重佳氣滿門春仁賢爲寶宜遐壽德業相承必
潤身富貴華名超世界康寧晚福笑仙人詠棣含飴和樂地嘉賓又
是頌弧辰

南震熙

龜骨康寧鶴髮新偕歡湛樂泰和春芳年曾就文章業晚境堪爲富
貴身洛上風流常滿客鄉中恩澤普施人范圖恭獻萊斑舞又有麟
孫祝壽辰

白永基

一翁慶筵兩邊開
湖洛皆知此日回
大人年壽爲仁得
孝子家聲種德來
仁施貧族曾分土
惠救荒年又散財
同窓昔日多多士
我昨公今有此盃

申泰魯

正憶劬勞感慕新
時維雨露旣濡春
爲仁得壽至公道
承業成家先數身
比隣花樹悅親戚
同室錦絃偕老人
舞彩稱觥皆盡美
極南佳氣耀星辰

韓準教

昔非不足降祥新
今日重回舊甲春
玉液霞醪仙趣味
韶顏綠髮好風身
儉勤剏業兼脩己
嫺恤行仁廣濟人
蘭棣盈堂琴瑟友
陔歌岡祝際良辰

金顯謨

南天昨夜極星新
錦史先生六一春
養心高潔終無俗
持事公平孰

毀身彩舞庭前趁孝子賀辭席上會詩人
君家餘慶知由德鍊樹開
花降甲辰

仁齋金完濟

綾城古宅命維新華甲今逢介壽春
勤儉家聲成此福緩和心法立
其身江山不老開仙境風月無邊作主人
聞道耆英連洛社饗斯朋
酒祝良辰

安聖洙

綾城古宅賀辭新床棣閣梅和氣春活佛施仁
應本性眞仙享福是
閒身先邀洛社會中友更作網川圖裡人
挹彼門前湖水大頻年壽
酒介眉辰

沈天澤

烏紗鶴髮鏡中新正值韶光二莢春
舞彩庭儀應繼志造端閭範已
修身洛中相樂多文士湖右皆稱穩福人
梅閣夢樓餘此慶稱觥次
第設弧辰

李元善

富貴兼全德日新
桑弧再設甲年春
彩舞蘭庭賢有子
琴聲梅室樂其身
風送香山雲集老
星明南極世稀人
難弟難兄塤篴席
蓬萊霽月照良辰

月居成有慶

六十一年華髮新
霞樽釀得住長春
綾城古族餘喬木
錦史清風不老身
賀詩絕唱漢唐客
交契多情管鮑人
舞彩吹簾床瑟又
沔陽花樹亦佳辰

李會龍

白髮星星精彩新
六旬花甲正陽春
餘慶一門連亘福
遐壽百歲健康身
令名傳世文章士
篤行承家孝友人
瑤琴床下趁斑舞
滿酌紫霞獻賀辰

尹琬

宦海風情入夢新
溯懷聖代泰平春
白首便成仙侶骨
黃金仍作富

翁身鄉隣草偃靡風客京洛雲來頌德人天降洪福公全美萬物羣生自得辰

李鍾大

盤村物色晚來新
鎮樹花開壽域春
鳴世文章皆誦口
承家孝友且修身
斑衣可愛稱觴日
黃耆從知降福人
半醉仙翁無盡樂
甲回二月際良辰

李圭桓

惟公風韻老猶新
聞道申菴面面春
獻觴古宅劬勞日
舞彩中庭喜懼身
曾爲漢北三尊客
晚作湖西第一人
弟後兄先餘慶在
京鄉宗族樂生辰

李心敦

南極爲君光彩新
享年不啻甲年春
賢子賢孫仁孝裔
宜兄宜弟壽康身
名聲一世無雙士
事業平生第一人
瑟琴偕老閨中友
舉酒酬君醉幾辰

李建斗

富貴公家事事新
今回六十一
年春壽星來照福
星地天性安全德
性身向宴已同京
洛友此筵更爲故
鄉人棣萼瑟琴趁
彩舞滿堂和氣樂
良辰

李種潤

舊甲重回荊祿新
德門吉慶此陽春
三尊稱達稀前世
五福由仁備一身
仙緣西宴來王母
瑞彩南天照老人
梅閣棣樓芝蘭席
年年此日會令辰

雲菴金憲容

京鄉置酒并新新
正是鶯花富貴春
先業儉勤能潤屋
平生溫恭自持身
東方朔後無雙士
南極星前第一人
夜夢暫登蓬海宴
羣仙賀祝設弧辰

高正柱

回度華筵白髮新
床琴好友六旬春
財無兄弟同勤業
義重親知必

敬身誦道人間多福老今看地上有仙人子孫克肖垂餘蔭世世相傳此慶辰

羅鵬學

君家仙釀醅新絳甲重回二月春先賀同居三世樂復期不老百年身聲名湖海無雙士心德京鄉第一人極宿婺星偕映彩況今景物際良辰

金容九

京鄉賀祝無彊年嘉會洞中設壽筵承訓家庭君子學隱居都市大人賢能散千金名聞世從知五福理由天孟光司馬兼曾孝宜寫仙圖處處傳

李鳳翼

公之華甲又今新和氣盈門二月春揚名一世先憂國修德平生自潤身疑如函谷關中客或自蓬萊頂上人更祝君家無量福年年歲歲設弧辰

洪台裕

壽翁壽甲壽眉新壽酒壽盃壽域春壽婦壽夫壽鶴骨壽兄壽弟壽
松身壽門久積壽仁德壽富仍兼壽貴人壽席壽籌无量壽壽星瑞
彩映弧辰

俞鍾哲

佳哉南極星光新和氣融融獻壽春陰德遺傳淳古宅器塵不染泰
平身蓬島前宵添鶴筭瑤瑟夙世降仙人肖子肖孫今日願年年歲
歲祝斯辰

姜大起

甲年復到福新新蘭桂呈祥共得春孝友傳家承舊範安閒養德潤
其身耄期遐筭祈千歲慈惠仁聲頌萬人床和埴篴調寶瑟津津餘
慶後來辰

蘭亭尹 瓚

棣庭湛和老尤新風樹多懷六一春左琴右瑟調絃友麟子鳳孫斑

舞身富貴元從勤苦處壽康皆得德仁人蒼顏白髮無塵累幾度增輝南極辰

李心潤

正當花甲設弧新天天桃花二月春鄉隣皆頌仁賢士家勢兼爲富貴身榮名百世子孫昌極壽千年兄弟人趨庭肖子衣斑爛起舞輕風旦日辰

李建忠

壽星南極瑞光新弧矢稱觴二月春白髮韶光聯棣萼碧桃消息脫精身純孝可應傳百世施仁奚啻活千人瑤琴三尺芳蘭秀我爲君歌舞彩辰

俞鎮益

甲得韶光新一家揔是春學優早登仕德尊自潤身錦繡添花士史編遺蹟人繼繼無窮慶年年賀此辰

李奎宰

藹藹高門和氣新
新春正是甲年春
孝承先世曾旌里
德冠吾鄉自潤身
舊基泉石閒居士
早歲簪纓退老人
若使此筵兼此酒
千秋何日不良辰

李啓祥

時維二月甲花新
洛社鄉廬都是春
詩心平日常無我
孝父曾年不
有壽樂道應同齊
魯士論詩何愧漢
唐人有弟溫公會
子孝孟光又是樂生辰

崔熙載

壽域康寧漸益新
時維甲戌年之春
索共梅花含笑面
芳園棣萼同根身
羣山酒熟醉千日
南極星明來老人
尊門斯筵無窮慶
肖子賢孫又吉辰

前叅尉韓百憲

弧辰重設月初新
和氣滿堂都是春
種德沔陽承肖子
移家漢北可安身
偕老琴瑟同此席
美傳詩禮有斯人
華軒賀樽兼賀祝
百花生

日亦佳辰

洪思學

先生花甲屬芳春
福祿綿綿日益新
趁舞蘭庭斑爛服
添籌海屋健康身
蓋世仁慈能濟衆
根天誠孝已過人
弟兄泄樂兼偕老
和氣融融獻壽辰

李鍾麟

先生花甲再逢春
白髮韶顏意更新
露圃芳香今晚節
雲霄一羽是前身
晝耕夜讀曾何日
綠帽綬冠尙古人
積世仁蔭從此發
輕風吹雨釀花辰

李圭憲

仁壽由天理可知
吉辰花甲已留期
福力無彊賢且頌
家聲克紹孝先爲
山中宰相應如彼
地上神仙又在斯
偕樂雙琴兼彩舞
斑衣五色繡餘絲

趙秉珪

天度一週舊甲新大筵好設太平春早信黃金能却老至公白髮不
饒人孝仁宜受天膺祐肥胖從知德潤身聞道權爐沽已盡來賓醉
步攢弧辰

湖雲趙秉琬

歲在闕逢白髮新花明鋏樹壽爲春近日朱門叅試客昔年盤谷讀
書人分土恤窮名此世由仁好德潤其身先我一旬開慶宴遙望嘉
會祝弧辰

前主事惺軒白忠基

德門斯慶最新新青草池塘又一春包裏箕裘常穩業世間孝友兩
兼身塤箴床瑟和盈室花樹庭蘭薰動人緣薄未叅同甲會洛中仙
釀負良辰

李哲煥

六十一年五福新先生華甲際芳春碧桃花下初長日南極星邊不
老身爲業讀書眞學士無心宦路是閒人相公山下賢宗宅再設華

筵樂此辰

李來用

設弧門楣瑞輝新六十一年再度春
童顏在時青年客
齡背如今白髮身
交盤漿液皆仙物
滿室藻蓮不世人
實樹庭前琴瑟又永將此
樂送餘辰

附輓詞

凶音忽到是何音回首悵望淚滿襟一世光陰人若夢百年情誼我知心如非落日離公去不復青山有此臨花樹佳期今已絕佇看雲外更誰尋

從姪正會

惟公純厚德福祿揔由天嫺睦姻親悅儉勤世業傳縱然回甲壽胡不享耄年慈善平生事亦難寫一篇

外甥李海喆

人說德門人詩禮家后人心蘊三別璞望洽一鄉人厭作世間客去爲天上人藐余不似者元厚庇中人無限私悲痛非他玉潤人縱然何益兮難作九原人無瑞珠立淚徒爾愛吾人

外甥李炫

此行一去更無留回首西風感淚流幽宅名山何處是化仙駕鶴下楊州

外甥南莊祐

氣力常康健惟冀享永年沈痼無多日胡爲永訣天雖承先世業奈何後子孫甥館無窮恨難忘教養恩

甥姪洪翰裕

奎星近日隕于天仁岳無光漢水咽悽悽風雨慘愴夕一曲輶歌永去年

外從弟金春植

生長湖北花樹隣青葱白髮至今親治家勤儉能成業處世溫良悅服人到老深交眞莫逆爲宗廣惠可稱仁吾門今日棟櫟折支厦松心不復春

四從弟兢書

幽明歸路是同年君去泉臺便化仙修德傳家家有訓以文鳴世世稱賢子孫趨哭含悲地親弟淒涼永訣天若使錢金圖得壽富人曾脫此中筵

族從顯書

仙降海東多擅名一朝騎鶴向三清床頭鳴咽雙琴曲窗外淒涼隻鴈聲落月空櫟如對面滿家花樹遠含情峨嵋山下千年宅哭送靈車抵雪城

族從昌祖

來自甲年去甲年生行死返誠胡然漢北青山風雪夜非徙哭死哭其賢

族姪仁會

人之生死云何理可惜其人又昔年悲風吹送青山外憾淚重遮白日天

族從享祖

確以持心儉以身公於今世古之人平生不用浮文飾蓄德潛中老益新

拜話床頭如昨日遽然化作玉京賓從今無托爲先事憶後量前淚

滿巾

族孫本綾

嗚呼天地有盈縮焉日月有晦明焉人於其間一徠一逝理所固有者也然而聖人云仁者必得其壽善者必享其福以公之仁意謂必得無疆之壽以公之善意謂必享不盡之福矣造物多猜好事有魔緣何一崇永訣千古抑亦聖人欺我乎哉未知者天也難諶者理也自我僑居京城之日所恃爲何以公之謂也有疑必咨有事必疑誼壓泰山情傾河海其豈偶然哉至若敦睦之義爲先之誠尤有難於口道者也天何奪乎我師地何藏乎我恃適因歸覲之時不翅道路之遠兼有妹婚之擾未得趁哭於丹旌之前撫念到此欲言先淚欲哭先咽悠悠我私寫懷無地祇以數行之詞欲叙萬一之悲云爾嗚呼哀哉

天亦無知奪我師以文爲誄淚如絲德蔭千秋名不絕仁風一代韻長吹夢耶雲外青山立真矣門前白馬馳漢陽城下依依樹誰與看

花舊日枝

族從昶祖

謫下人間六一年莊園蝴蝶夢中緣孝友根天先祖繼儉勤潤屋子
孫傳暫留逆旅歸如客久厭塵寰更作仙花樹雪山春色暮雨絲和
淚倍悽然

族從然澤

祖先遺蔭抵公新宗族鄉隣普及春六十一年塵債了飄然更作玉
京仙

族弟善書

欲借騫槎訟玉京近來閭簿失其常仁不享年違正道病無良藥棄
醫方冽冽雪風慘漠北聲聲薤露返襄陽吾在戚兄君在弟以兄訣
弟最悲傷

戚從李學冕

享壽纔經六一年較君才德理胡然前春詩酒留羈跡亘朔刀圭守

病筵餘日更推知己少平生統計用心賢溫公之敬兼曾孝瞑目泉臺穩若眠

友人金容璿

爲富爲仁六十年一朝何故謝塵緣他時如問君消息雲月黃橋已化仙

完山后人李淵會

六一年前天上仙來之年是去之年玉京同僚歡迎矣塵世親朋忍送焉著述詩書成古帙逍遙筇屐備靈筵朝班若問人間事子與孫皆種福田

全義后人李春世

六十年光似水流薤歌一曲遽千秋居家孝友承先訓處世寬仁識自修洛社湖庄懷舊跡詩塲酒席悵回頭如今天地皆溷濁好向泉臺臥不憂

友人沈星鎮

維公種德一生前塵世始終亦在天六十年如昨日百千萬事總他邊

今年不意哭公門目觀典型若耳喧萬事皆成生在日可招難返永歸魂

金鳳基

天胡遽奪此賢人六一無多夢裏春曩日同樽焉識訣悠然佇立哭情真

洪性德

齒爲吾弟德爲兄六旬一歲去何輕風悲冷枕孤鸞夢霜落寒天隻鴈聲家已積財能積善山惟埋骨不埋名人間後事兒孫在庶慰幽靈地下情

友人孟夔璧

故故遲遲此日行丹旌飄拂向仙鄉洛社浮雲如夢冷嘉城落照有歌長指點鞭頭山更遠傷心渡口水何忙剡棹悠然乘興夜良辰雪

月我懷涼

安鍾武

人言公化去初聞我不信人言公別世再傳我懷搢人言文星墜三
傳我心慙南望淚先下海峰青數仞西出今行路飄然錦史翁洛駕
秋雲冷湖樓夜月空事去千思後塵輕一夢中悠悠山日暮薤歌數
曲終

安鍾文

嗚呼錦史子此行問何行人間黃壤隔天上玉樓成如痴又如呆默
然想平生赫赫舊家門本籍是綾城白身纔得免一命不稱情家肥
身且潤修齊盡心誠季君髮鬚髻尤篤友愛情姜肱豈獨美伯康且
傳聲韓韓棠棣下難弟又難兄家法和而平壺儀靜且貞風火六六
吉琴瑟璃與珩庭前趁一子二南業已精克紹箕裘業洞屬無變更
一生孝於先至誠在先塋香火永世傳寤寐向松京甲戌是何歲是
歲死生并今年中和節設弧賓客迎晚福世罕比賀詩箱篋盈托余

校讐役辜負悔心萌歎此一城內逢輒進壺觴晚年莫逆誼兩人有
心盟病床日委訪娓娓肝膽傾天不仁人壽一朝棄色榮誰云千古
別遽作不歸程超超汚陽路杳杳送丹旌萬年嗟已矣不禁淚縱橫

友人姜敷錫

人間六十即今歲來去何由甲戌年家業守成門戶昌貧窮廣濟子
孫傳事功已遂平生志仙跡從遊永訣天杜鵑啼盡月無色薤露悲
歌去去邊

金麟九

忽聞錦史化神仙此別胡爲忍此年漢水東流嗚咽日鄉山西出杳
茫天先塋表碣榮惟感後世遺稿孝可傳泣想今秋文酒夕幽香淡
泊菊籬邊

李相郁

嗚呼消息夢耶真松栢西風淚滿巾非徒公家棟樑折吾鄉從此寂
無人

南相規

晚年今作在京鄉舊面依稀不可忘從儉餘風家業大普施平日頌
聲長羣樹迷翠愁雲起遠樹含悲暮景傷極目斜陽搔首立烏啼人
散意淒涼

沈遠高

京鄉優樂幾十年不覺之中遽化仙無非哀淚無非哭半是愁雲半
是烟前言歷歷賢妻記後事昭昭肖子傳百歲壽長仍不得仁人古
宅理胡然

高正柱

靈柩還鄉淚不晴漢江樹色遠含情化魂天上仙從去有志人間事
竟成長安甲第繁華夢古寺中菴寂寞聲如許孝仁無量福胡爲未
得百年生

李啓祥

薤露聲聲和哀詞寒天正是欲暮時浮世百年無宿債碧山十月有

歸期弟兄不復同
衾樂賓客悽然執紼悲松栢
西風千古恨
行今日竟何之

南相允

白首康寧奄化仙
公於五福獨能全
孤孀盡哭崩城痛
一胤號天泣血漣
永隔幽明今何日
含淚成葛已忘年
聲聲薤露斜陽路
遠樹蒼蒼鎖暮烟

李圭鐵

桑梓留陳跡
漢師送暮年
如何千古訣
丹旂夕陽邊

俞鎮萬

玉帝命招謫降仙
壽何一甲不加年
世間榮辱歸陳迹
天上逢迎續舊緣
東駕靈輻親友送
南遣基業後孫傳
院坪古宅前宵月
空使諸人淚潸然

牛峴振興會長崔上澈

今朝此別夢中驚
後夜千年不復明
孤棘雙麟能盡禮
寒梅隻鴈那

忘情一鄉曾慕賢公德百世應傳孝子名陀佛山頭幽宅在願歸極樂幻前生

金峙里振興會金炳俊

落木寒風雪月天寄年舊甲是歸年箕裘產業先賢繼詩禮家聲後世傳青山影裡薤三曲白玉樓中記一篇斯公遺德應餘裕子子孫孫萬歲連

金東駿

生長本在此同鄉天姿清朗才且良爲家勤儉耕且讀和氣融融樂未央鄭公庭下書葉綠江令家中筆花香兄及弟矣式相好子若孫兮教有方不用一錢風月好酒滿樽中客滿堂箕裘世業傳家在簪笏功名蔭路揚奉先思孝皆盡美古山松栢鬱蒼蒼盤谷田園非不好居然泉石在洛陽潘岳家風多著迹蘇氏譜系遠遺芳憶昔青春年少日與我親燈共一床情如管鮑深相許誼重雷陳難可忘中間相別如千里洛雲湖月共蒼茫今春花柳懸弧席慶祝無康壽且康

無量東海當添酌老人南極倍生光鳴乎痛矣此何事遽聞凶音我
心傷華柱千年化鶴返江南一夜騎鯨忙帽岢南邊攀素紉向風不
覺淚滂滂長夜泉重隔人世青山寂寂水洋洋

李敏泰

三十年來誼重人無言不到是情真一聲慟哭還疑立往事悠悠桂
洞春

李建豐

六十平生富貴人誰非頌德且溫仁靈輻拜別哭無盡薤露聲斷淚
沾巾

韓泰錫

從古泉臺路不平嗟公今日是何行鄉中士友淒涼淚膝下子孫號
哭聲功成自足一家業德厚應垂千古名丹旄素車人去後半輪曉
月照佳城

鄭夏亨

丹旄翩翩白日遲此行埋沒渺前期
薤歌聲斷山容寂椒葉陰深隴
影移誰自停靈同爵酒我今欲輓復爲詩
斜陽去去荒原路孝子仁孫不勝悲

呂運新

諱音來自漢陽城收拾慌忙淚眼橫
枌當北海延遐壽鴈度南天起
冤聲郎官世德表章句鄉里感恩轅實情
占宅靈原千古樹青青者葉蔭還生

蔡昇默

聞道先生奄化仙非真非假夢其然意云
平日無彊壽豈料今朝斷俗緣宿契憑誰
聽善貴調琴從此不須絃嗚嗚咽咽水流
曲淒雨愁雲欲暮天

李炳

惟公仁壽壽終年何處人間更有緣
塵寰了債清閒日玉府掛名極樂天
江山興致遊來士花鳥風流老去仙
輓哭遲遲雲樹暮夢中往

來共凄然

李 燮

聖世郎官不剝歸萬全忠孝見今稀
泉臺賢哲應爲賀洛社親知亦
失輝特別佳城新地定遙邊
靈魄舊山依積年嫺睦誰能忘有淚京
鄉衆莫違

韓祥東

君從仙子辭塵囂六一春光夢寂寥
甲會笑談如昨日未期凶信到
今朝桑榆昆季情何似湖海親朋
膽欲銷京北閉門千里返滿山
悵悵葉蕭蕭

李奎宰

氣宇軒昂惟賦仁一生慈善迥超倫
捐金普助官公署裂土均施戚
族親天何奪也文章手人不間於孝友
身空櫟秋月長長夜彷彿儀
形入夢頻

趙喆顯

附祭文

維歲次乙亥二月庚辰朔二十一日庚子戚孫金永稷謹以菲薄之奠哭告于從仕郎主事具公之靈曰嗚呼我公早承庭訓持身恭謹樹立家聲聲聞遠近君子居止里仁爲美行此一鄉德洽數郡家有廩粟樂善好施歲或饑饉出納一文姑蘇義庄麥舟付卿買置祭田寒食清明修墓豎碣草木含精東床三人俱是絕奇子學和東聲譽遠馳廿世門戶復可維持季方賢良後事先知鄉黨咸慕宗族追隨一入德門和日常遲嗚呼哀哉公何遽斯辭曰招招魂兮遙相望洛雲湖月共淒涼佳城占兮故山隴新飾靈車塗金黃人客繁兮滿被山舉手招招共徊徨吊者未吊兮還佇立臨風共灑淚滂滂山靈庶慰孝心兮日夕覲侍父母傍今我來哭兮不成聲惟望歆此不腆觴

先考府君家狀

府君諱翰書字駿八號錦史始祖諱存裕高麗檢校上將軍歷數世有諱藝三重大匡沔城府院君諱榮儉宣忠翊贊功臣典理判書入李朝有諱成亮判安東大都護府事諱緒兵曹判書諱文老翊贊功臣諱公準刑曹佐郎不仕號湖隱曾祖諱序祖諱利元俱以孝學聞于朝 特贈教官考諱然敝號隱庵 孝陵叅奉妣清風金氏昌善其考也 高宗甲戌二月二日府君生於沔川申菴第生有異質自幼不好游戲恆侍長者之側稔聞爲學之道簡默寡言儼如成人及長孝友純篤遵親命勤儉治家無罄儲之憂養親滌瀦無闕及遭內外艱哀毀踰制幾不欲生鄉黨咸稱焉 高宗甲辰筮通信司主事府君不樂仕進仍呈遞祖曾兩代卓異之孝未能闡揚府君繼述親志殫誠竭力竟蒙綽楔之典自沔城公以下至考妣先塋罔不豎碣又置祭田以奉精禋以至外祖暨先外祖與姑姊妹之墳墓亦皆置田俾奉香火府君篤於孝友如是且於 文廟之義捐面署之助給

錦史詩金

不爲不多此皆出於以義爲利之本性然也我王考有筵室而前生子隨之府君養之教之娶室而析箸使之安居此亦推及父母之所愛者也有婿三人皆有分產窮交貧族見急輒救其慈善之浹人心者實多鉅梓先稿刊頒派譜族黨咸頌有弟同老財無甲乙紫荊不變因心篤友出於天性也府君雅不喜著作而春蘭秋菊佳辰令節若逢同心之友輒封腴佐酒竟日觴詠亦可見風韻之弘長至今耆舊碩德尙慕誦焉配青松沈氏考諱宜祿幽閒淑嫕克備閭範尙無恙在堂府君於甲戌十一月七日考終于京第享年六十一嗚呼痛哉葬于唐津郡汧川面沙器所里妣塋下丙子九月二十六日移窆于坡州郡泉峴面金谷里卯坐之原府君無男不肖乙會以姪子承嗣女長適全州李海詰次適德水李炫次適宜寧南莊祐乙會男滋憲滋俊滋興俱幻嗚呼不肖晚生謏陋不能述府君懿德之萬一略撮梗槩如右以埃立言之君子

丙子十二月

日不肖孤乙會泣血謹錄

墓碣銘 并序

坡州之治泉峴之鄉金谷負卯之阡有綾城具公藏嗣子將樹貞珉
丐余銘顧余朽筆奚足不朽公哉揚人之善彞性耳不終辭翰書諱
也駿八字也錦史其別字也其先肇自高麗上將軍存裕歷數世有
三重大匡藝食采沔城典理判書榮儉策宣忠勳 李朝有安東大
都護府使諱成亮兵曹判書諱緒翊贊功臣諱文老皆顯祖也曾祖
曰序祖曰利元兩世皆以孝學特 贈教官考曰然敞 孝陵叅奉
妣清風金氏昌善之女也公以 高宗甲戌二月二日生周一甲子
而卒十一月七日也公自幼有馴行事父母如古之人怡色柔聲以
安其志甘蠶溫清以便其體前後遭艱情文咸秩曾王父若王父皆
有孝行而未克闡揚公殫其誠力竟蒙旌典累世先壠斲石而備其
儀置田而潔其享至如外氏及姑姊妹之墓亦割土而繼香火有弟
同老物無爾我樂善嗜義矜恤貧窮有庶母牽其前生子而來則公
視若同氣撫之誨之擇對而娶之析箸而奠居之於是乎宗族稱其

孝鄉黨服其義公於甲辰筮仕爲通信司主事見時象不佳棄官歸
田春秋暇日擊鮮醢酒與鄉鄰耆舊觴詠爲樂其志節之介特風流
之弘長又如是也烏虜賢哉配沈氏籍青松宜祿其父也有壺德而
無胤嗣取從子乙會爲之後三女適李海詰李炫南莊祐乙會三男
并幼噫公之志行拔萃若使遭值昌運進塗大闢其所樹立者當不
止於一家一鄉而終焉蘊而不施晦而不章知德者之所悼惜不亦
宜歟然厥嗣式穀善述家風孫枝方茂餘運無窮不食之報其在乎
是也夫銘曰

綾城哲人有孝有友成教于家克昌厥後風水清美金谷之阜標揭
盛名配石不朽

通政大夫前秘書院丞安東金甯漢 撰

資憲大夫前議政府叅贊原任 奎章閣待教驪興閔衡植 書

海州吳世昌 篆

錦史詩鈔跋

錦史具公歿公之胤乙會甫蒐公所著言志將鋟行于世囑余校讐
余於錦史不惟托契之深且有姻誼顧何能辭乃敢泚筆祛煩就簡
務極精粹而以余謏陋安得無遺珠之歎乎紫泉弗湏兩翁已弁于
卷首則亦可證其一櫛全鼎之美矣人愛公詩我愛公志公性高尚
不喜進取日吟哦澗邊林下一句一字無一點塵埃氣可謂心錦言
史錦史之號亦符矣乙會甫闡揚先懿有此美舉錦史雖古其詩不
古可感也夫


心湖完山李範喆跋

錦
史
詩
金

錢
史
詩
金

0100-0001

昭和十二年九月拾日 印刷
昭和十二年九月拾五日 發行



非賣品

編輯 兼 具 乙 會
京城府嘉會町二〇八番地

印刷人 權 泰 彙
京城府嘉會町二〇八番地

印刷所 新 朝 鮮 社
京城府嘉會町二〇八番地

發行所 新 朝 鮮 社
京城府嘉會町二〇八番地

振替京城一六五四九番

